

東
華
續
錄

東華續錄

咸豐三

臣王先謙敬編

臣陶澐宣恭校

五月壬辰朔 上祭 太廟加上 孝賢純皇后 孝儀純皇后

仁宗睿皇帝 孝淑睿皇后尊諡○癸巳諭內閣刑部奏審擬

寶源局匠役圖借官銀糾眾滋鬧一案並請由工部錢法堂飭令該監督隨時約束已依議分別辦理自足儆戒將來惟戶工部錢局人數眾多如果該監督大使等平時管束有方向至有恃眾抗官之事前因通政使司參議齊承彥條奏曾經降旨令寶泉寶源兩局堂官妥籌約束章程因思該工匠等均係在官人役近在輦轂之下膽敢鳴鐘聚眾復敢不服彈壓將地面及該管官閉門扣留雖未貽誤鼓鑄寶屬目無官長大干法紀儻不嚴加整頓必致

釀成事端所關匪細嗣後應如何嚴定規條先事豫防之處著該堂官仍遵前旨迅速妥議具奏尋戶部工部奏擬約束匠役章程一各廠匠役平時責成大使查察朔望點驗責成滿漢監督覈對年貌一各廠開門各有定期責成中廠大使並派筆帖式一名分赴抽查一閒匠額數鑪房八人磨房六人不得於額外私相容留一各匠出外買辦食物責成地面堆撥弁兵隨時查察一各廠閒匠令八行正匠管束八行正匠令鑪頭管束有不安本分者稟明本廠大使究辦從之○甲午諭內閣據戶部禮部會議升任給事中呂賢基陳奏四條一摺學校爲教化之原士子訓課責在校官校官賢否責在學政近日校官一途半皆年老衰庸及末學淺見之士著各省學政嚴行考覈文行兼優者方准列薦庸劣不職者卽行甄別至於月課歲考尤須認真舉行所課試卷按季申送學

政諸生優劣學冊三歲咨部備查總期實力奉行毋得日久生懈其安徽江蘇江西湖北等省捐賑銀米及道光二十八年推廣捐米事例俱著一律停止至不肖官員藉公營私夤緣朘削尤應查辦著各直省督撫等於所屬各員內畱心訪察無論是否捐輸出身但有夤緣朘削及擾累民生者隨時指名嚴參懲辦以儆官邪而挽頹風○諭戶部議覆給事中王東槐奏停止捐輸籌畫倉儲並枚舉耗財四害一摺各直省督撫有整理地方之責如果措置得宜一切悉臻妥協何至耗損經費至河務修防動款甚鉅近來銀價增昂工料多係以錢折算爲數本有盈餘尤應力求撙節州縣爲親民之官若不崇廉懲貪屬吏何從激勸陋規不裁則挾制之風不絕流攤不禁則虧那之弊不除著各該督撫及河道總督實心整頓於貪墨各員隨時汰黜務使吏治肅清地方靜謐庶屬

吏咸知儆畏而經費不至虛糜其南河工用疊經嚴飭不准絲毫
濫支東河事同一律並著該河督飭屬一體撙節辦理○諭軍機
大臣等有人奏閩浙總督劉韻珂自到閩後聲名大減眾口一詞
洋面搶劫勒銀取贖之案甚多壅不上聞門丁王瑞肆行貪黷眾
目昭彰該督不能約束以致士民敢怒而不敢言前該督親赴臺
灣因該門丁濫索多費幾有覆舟之禍其事合省皆知並上年夏
間漁山洋面會剿盜匪有台州遊擊被盜焚擊落水該督捏奏先
時落水又有溫州武弁在瑞安海口披戕之案該督並未具奏漁
山盜匪肆劫漁戶數百人不能出洋至該管道署訪諜幾至激成
事端各等語著裕瑞黃贊湯會同嚴密訪查該督辦理公事聲名
如何該門丁王瑞有無倚勢招搖貪婪不法實據該督有無縱庇
情事其被參各款均著逐件悉心探訪明確據實具奏不准稍涉

含混將此各諭令知之○丙申訥爾經額奏開導英人業已領悟起碇南旋諭訥爾經額仍加意籌防海口沿海各省督撫一體嚴防妥馭○丁酉諭內閣據裕泰鄭祖琛向榮由六百里馳奏生擒首逆殲除匪黨地方一律肅清一摺覽奏欣慰此皆仰荷 皇考在天之靈俾首逆速就擒獲黔庶得以稍安興思及此敬感交綮至湖南逆匪李沅發本係山野莠民烏合小醜自上年冬間結會糾黨戕官踞城竄擾三省蔓延愈甚迨裕泰親往督剿數月之久竟未蒞事日盼捷音何能稍釋茲據裕泰等奏稱該匪自屢次潰敗之後東奔西突經該督等設計誘至金峰嶺山內該逆仍復抵死抗拒該督等復督率將弁一鼓作氣距踊登山統計殲斃二百餘人生擒大小頭目羅登爵等五十八名滾巖跌斃者不計其數首逆李沅發帶傷由後山滾落崖澗當被鄉勇生擒縛獻地方一

律肅清裕泰接手辦理軍務雖不免遲延然首逆就擒斬獲甚夥著免其處分三省所調官兵均卽裁撤歸伍仍飭搜捕零匪勿畱餘孽裕泰著妥辦善後事宜不可止顧目前因循草率兇暴雖除良善未安該督當體朕心爲久安之計已革巡撫馮德馨道員楊炳堃提督英俊總兵雙德等失誤事機奏報不實仍著裕泰遵奉前諭查明根由分別文武失事輕重定擬具奏不准因業已報捷稍爲開脫自干重咎所有傷亡官兵勇應行給予卹典之處著裕泰查明分別題咨照例辦理該省失察之文武官員本應議處姑念首惡就擒均著加恩寬免至此次逆匪擾及三省各該督撫等會籌協剿防堵均稱得力裕泰著加恩晉加太子太傅銜廣西巡撫鄭祖琛貴州巡撫喬用遷並著賞加太子少傅銜與湖南提督向榮廣西提督閔正鳳貴州提督秦鍾英一併交部從優議敘

此外各該省在事實出力文武官員及紳士鄉勇人等著裕泰鄭祖琛喬用遷查明實蹟分別酌保候朕施恩毋許冒濫逆匪李沅發著卽遵委委員檻送京師盡法處治以申國憲而快人心○諭軍機大臣等有人奏廣西會匪猖獗請飭嚴辦一摺廣西向多會匪近因楚匪竄入境內各府匪徒乘閒四起地方官不能兼顧以致蔓延爲患如所奏上年馬平縣高圩被焚劫者數十家遷江縣樸佑村焚劫至數百家今年正月有貴縣永福永安等州縣焚劫之案近日宣化慶遠東鄉桂平等縣及象州地方皆有賊首嘯聚分夥肆掠由永福至雒容修仁各縣屬村莊被其荼毒者數十百家惟象州報劫至五百村爲最甚而蒼梧縣赤水村至於燒毀一空果如此等情形賊之害民已極見在楚匪已經剿平該撫鄭祖琛當督率文武員弁奮力嚴拏分路掩捕不得任其裹脅句結

坐使滋蔓難圖遇有拾獲隨即奏辦切勿稍存諱飾懷之將此諭令知之○癸卯諭內閣御史隆慶等奏請嚴禁鑄錢違式一摺寶泉局鼓鑄制錢配用銅鉛輕重向有定式自應局員隨時查驗有輕重不均者飭令回鑪不使支放之時臨期挑換茲據該御史等奏稱每月監放八旗餉錢竟有薄小易碎字樣模糊者每千攪雜數十文勢難逐串查驗而兵丁食用所關豈容任意以偷減之錢強爲支領等情因思戶部寶泉局如此工部寶泉局其弊略同嗣後著兩局滿漢侍郎督率該監督廠大使等實力整頓悉遵定制毋任草率偷減如有厚薄大小輕重不符及文字模糊磨鑿不精等弊隨時查驗將鑪頭人等嚴行懲辦並將監督等官參處見在新章甫定勘懲兼施該侍郎等若止有保舉而無參劾錢法安望有起色耶懷之○李璋煜以病免以陳旰爲江蘇布政使調蘇敬

衡爲福建按察使

由甘肅調

○甲辰夏至祭

地於

方澤

○戊申諭

內閣前飭諭在京部院大臣保舉人才經大學士穆彰阿等遵旨

陸續保奏按次召見並令軍機處將各該員履歷考語分晰開單

呈覽隨時披閱此次特旨保舉原期拔十得五以昭激勸而廣接

羅卽在外任並在籍各員亦經降旨飭令來京召見候簡除大學

士穆彰阿所保宗室文采聶鴻已降旨以京堂錄用並將所保臬

司聯英飭令辦理鹽務以覘其才外其餘各部院大臣所保內外

各員朕當量材器使或予內擢或授外任自毋庸照尋常升轉以

示破格用人之意至見任學政杜翰吳福年丁憂學政龍啓瑞均

俟任滿服滿到京時由吏部題奏辦理○庚戌諭軍機大臣等前

有人奏廣西會匪猖獗已寄諭鄭祖琛飭令督率嚴辦矣本日復

有人奏廣西自去年賊首張家祥滋事官兵不能捕獲強爲招安

餘黨四散句結慶遠則張家福鍾亞春柳州則陳東興陳亞潰陳亞分陳山豬羊武宣則梁亞九劉官生象州則區振祖潯州則謝江殿平樂則紫金山一夥皆分股肆擾而陳亞潰一股爲尤甚似此盜風日熾該省州縣緝捕懈弛已可概見提督駐紮柳州卽爲賊蹤出沒之區何以任其往來不加懲創難保無欺罔畏縮情事著該撫將前後所奏各情按照摺內所指賊匪姓名實力查拏盡法懲辦並將廢弛捕務各員先行參劾責成文武員弁痛改錮習上緊會緝無任一名漏網以除民害而安邊境將此諭令知之○陳孚恩以母病乞休允之調杜受田爲刑部尙書孫瑞珍爲工部尙書以何汝霖爲禮部尙書

由署禮部左侍郎遷

○辛亥改山東登州鎮爲

水師兼轄陸路原設水師後營遊擊爲登州鎮水師中軍遊擊文登協陸路副將爲水師副將兼轄陸路原設陸路都司一員仍爲

文登協陸路中軍都司添設水師守備一員爲文登協水師中軍
守備撥水師前營東汛千總水師後營把總各一員水師後營登
中營登右營卽墨營外委各一員文登協存營水師後營登中營
卽墨營額外外委各一員俱隸文登協水師令新舊三營分轄洋
面○壬子諭軍機大臣等有人奏江蘇捕務廢弛屢釀重案請飭
查辦一摺近因盜劫肆行緝捕疏懈疊經飭諭各疆吏查拏究辦
如果隨時破獲按律嚴懲何至盜風日熾劫案纍纍若如所奏自
上年以來蘇州府屬城鄉搶劫重案層見疊出甚至紳衿家屬慘
遭開棺者兩案地方文武各官扶同隱匿民生莫保深恐別滋事
端著傳繩勘接奉此旨按照原奏案情迅卽遴委賢員督同地方
員弁認真訪查務將各案賊盜全數弋獲盡法懲治以靖閭閻儻
敢仍前懈玩或僅獲一二盜犯希圖塞責卽著從嚴參辦毋稍姑

咨原摺著鈔給閱看將此諭令知之○癸丑諭內閣工部議覆顏以煥奏塞子民堰添建滾壩並挑挖十字河引渠一摺此案請建滾水石壩工程既經河漕督臣會同勘明必不可緩自應及時興建乃東南兩河互相謗卸空文往返已閱年餘殊非實心任事之道著楊以增顏以煥親往履勘會同陸建瀛楊殿邦破除成見秉公商推將擬建之滾水石壩究應建於何地並囊沙引渠應否改爲減睡之處詳覈妥議迅速聯銜具奏務期和衷共濟籌及久遠俾漕運民田均受其益毋得各執一詞彼此觀望至所需銀兩無論在何地興辦均著入於另案比較數內不准藉辦專案以歸撙節儉復推諉因循致誤漕行並致貽害民田卽著該部指參懲辦○以法福禮爲內閣學士由太僕寺卿遷○丙辰諭軍機大臣等鄭祖琛奏各屬盜匪竊發擬將撤回官兵會督勦捕等語廣西界連東粵

黔滇一帶自上年以來時有土匪勾結竄擾肆行搶劫經該撫飭派員弁調集兵勇會同鄰省節次剿捕獲犯不少而盜風總未盡息邇因防堵楚匪官兵不敷派撥該盜匪遂敢乘機竊發四出搶掠非痛加剿洗不足示懲前有人先後條奏該省會匪肆擾屢經降旨飭令督率嚴辦茲據該撫奏稱即將提標撤回官兵移同協剿並飭司籌濟兵食以期大加懲創淨絕根株自應如此辦理著會同提督閔正鳳嚴飭帶兵各員會督漢土文武分途前往實力捕拏務將首要匪犯悉數殲擒不准稍畱餘孽一面出示曉諭解散脅從以安良善而靖地方儻剿辦未能迅速致餘匪仍前蔓延爲害惟該撫等是問其升任知府張熙宇如果緝捕得力卽著暫畱該省派委妥辦事竣再行飭令赴任將此諭令知之○丁巳諭軍機大臣等徐廣縉葉名琛奏盜犯悔罪投誠酌擬安插並撥歸

營伍等語此次廣東拏辦盜匪殲斃淹斃及生擒應正法者計共一千數百餘名已足大示懲創其隨同投誠之夥黨既據該督查係堅志投誠率眾來歸自應貸其一死著卽照該督所擬交地方官妥爲安插嚴加管束並將頭目張開平等十一名分別撥歸營伍藉資鈐制責令捕盜自效如果奮勉出力方准量加策勵惟此輩習成獷悍反覆狡黠見雖聞拏投首難保日久不復萌故智別滋事端該督等務須推誠示信俾不至故智復萌尤應隨時查訪如果不安本分卽應嚴行懲辦亦不可遷就姑容回護處分將此諭令知之○戊午諭內閣本年六月初九日爲朕誕辰王公大臣俱著無庸呈遞如意矣二十七箇月後照常舉行○己未諭內閣御史麟光奏整頓學務一摺國家建立官學原以教養宗支及八旗子弟自應循名責實無令曠功據稱近日各學勤學者少僅止

按時呈交月課多不入學殊非認真教督之道嗣後著管學王大臣嚴飭各該學正副管助教教習等督率諸生勤加講課以整學規毋任虛糜餼廩○瑞郡王奕誌薨諡曰敏○是月貸湖南鳳皇等五廳縣苗疆丁佃籽種口糧

六月壬戌諭內閣裕泰奏續獲匪犯見辦情形等語此案與李沅發同謀滋事各犯均已殲擒其餘從逆各犯亦多捕獲正法應行質訊各犯著卽嚴審分別辦理惟該匪等蔓延日久到處誘脅誠恐尙有逸犯免脫別滋事端著裕泰嚴飭密拏務淨根株勿畱餘孽其湖南廣西貴州交界及苗徭雜處地方向有會匪出沒結黨滋擾亟應乘此軍務告蒞之時妥擬章程力圖整頓其應如何設兵添防並團練保甲各事宜卽著會同鄭祖琛喬用遷悉心籌議歸入善後案內奏明辦理○癸亥永定河溢○潘世恩因病乞休

命以大學士致仕賞食全俸○命祁寯藻爲大學士調孫瑞珍爲

戶部尙書以王廣蔭爲工部尙書

由左都御史遷

○以刑部尙書杜受田

協辦大學士○甲子

上臨故瑞敏郡王奕誌第賜奠○以季芝

昌爲左都御史轉朱鳳標爲戶部左侍郎調翁心存爲戶部右侍

郎

由工部左侍郎

○乙丑諭內閣巡視中城給事中德奎曹琳堅奏訪獲編

造妖言之醫生辭執中又名辭精一及辭李氏均著交刑部嚴行

審訊○戶部奏遵議兩江總督陸建瀛條陳淮鹺新章未盡事宜

得旨依議惟立法雖極周備尤須任事之臣克己裕人方可令行

禁止著兩江總督暨湖廣江西安徽江蘇各督撫各矢公忠照新

定章程認真籌辦務使引暢課充以整鹺綱而收實效○丁卯賞

內閣學士法福禮副都統銜爲和闐辦事大臣○戊辰申禁州縣

稽延訟案○庚午諭內閣安徽按察使李本仁奏精訓練以作士

氣等語國家設兵衛民兵有定額原期餉不虛糜各將軍督撫提鎮等果能訓練於平時何至徵調不能得力如該臬司所奏各省兵餉不無扣剋攤派供應之弊額兵之中又多各項差使各營員署內工匠僕役均占兵糧應操之兵率皆兼趁傭販其不能專意講求武備已可概見著通諭各直省將軍督撫提鎮等認真校閱督飭所屬將弁隨時查察汰其老弱革其冗濫尤在抽練精壯勤加訓演使各營皆有選鋒勁旅平時甘苦與共臨事指臂相聯不至徒耗兵糧無裨實用庶足挽頽風而振士氣儻仍不知振作甘蹈相沿惡習一經訪聞得實定將該管官從嚴懲辦不貸勿謂言之不豫也將此通諭知之○賞故瑞懷親王福晉伯都氏郡王半俸○吏部以大學士卓秉恬祁寯藻應定何殿閣請得旨卓秉恬著爲武英殿大學士祁寯藻著爲體仁閣大學士○甲戌諭內閣

琦善奏請除積弊以恤民艱一摺據稱甘肅地瘠民貧前此承查
官吏將畸零地畝指爲隱墾私開勒限升科以致民力不支流離
潛匿殊失朝廷重農本意著照所請所有該省民地一萬六千餘
項番貢地四萬一千餘段共應繳銀一萬七千餘兩糧二萬三千
餘石准其概予豁免仍照向來舊額徵收以恤窮黎○諭刑部奏
見密案內牽涉大員並御史職官等語此案醫生辭執中以治病
爲名編造妖言見經該城訪獲交部據供有傳授道術等情著文
慶福濟豐紳據實明白回奏御史謝榮棟侍衛宗室海枚刑部主
事宗室載鏗均暫行解任並宗室奕紀著宗人府飭傳會同刑部
質訊在京候選之盛京刑部郎中長啟著該旗查傳送部備質○
諭已革湖南巡撫馮德馨於該省匪徒滋事輒因兵力未集啟程
遲延復藉信屬員率兵以收復城池入奏撤兵回省雖非京心

貽誤實屬辦理不善咎無可辭馮德馨著照部議從重發往新疆效力贖罪○諭軍機大臣等本日據刑部奏見審案內牽涉大員並御史職官等語已有旨令文慶等明白回奏並將謝榮埭海枚等解任備質矣此案據醫生薛執中所供前在新疆改換道裝在將軍衙門傳授延年益壽之法並經明誼薦伊至吐魯番見領隊大臣海枚拜伊爲師等語著薩迎阿卽照該犯原供各情據實明白回奏並傳旨令參贊大臣奕山總兵穆特布前任葉爾羌幫辦大臣忠泰各自具摺明白回奏毋稍隱飾忠泰前經奉旨令其來京儻已啟程在途卽著琦善查明該員行抵何處卽傳旨令其查照犯供明白回奏甘肅按察使明誼著琦善飭具親供奏明送部覈辦至該犯所供前至蘇州遇大學士潘世恩之在籍長子傳授道術等語並著傳繩勛查明取供具奏刑部原摺均鈔給閱看

將此諭令知之○乙亥諭內閣據文慶福濟豐紳各遞摺明白回奏著將原摺發交刑部卽提該犯辭執中逐層研鞠務得確情其另案革職之南營守備金國治著一併歸案審訊至該犯辭執中又名辭精一並有蘇生一黃魯香姓名若無詭秘不法情事何以屢易名姓並著刑部悉心究詰毋任狡飾文慶等自請嚴議議處治罪之處著俟定案時再降諭旨○丙子諭內閣吳文鎔奏海塘石工被水衝缺一摺本年夏閒浙省雨水較多潮勢洶涌致將海塘石工衝缺六十餘丈口門見已過水浙省海塘爲本省杭嘉湖及蘇省之蘇松常鎮七郡田廬保障攸關緊要著該撫督同藩臬嚴飭道廳等員趕緊設法搶護毋得再有疏虞以致潮水內灌一面查明下游州縣有無被淹處所迅卽據實由驛具奏吳文鎔於轄境要工未能先事豫防著先行交部嚴加議處○己卯諭軍機

大臣等有人奏兩廣盜匪充斥一摺據稱近日盜匪之多莫如兩廣一曰擄人勒贖一曰分界打單始於順德新會漸及番禺東莞廉州欽州靈州廣西之橫州等處皆有著名巨盜夥眾搶掠等語盜賊擾害閭閻殊堪痛恨似此猖狂無狀若非大加懲創尙復成何事體著徐廣縉葉名琛鄭祖琛按照摺內所指各情迅速派委員弁分路緝拏合力圍捕悉數殲擒毋任一名漏網以衛居民而安行旅至所稱各鄉村團練壯勇隨同官兵協捕之處並著該督撫悉心籌議實力辦理勿致養癰貽患是爲至要原摺著鈔給閱看將此各諭令知之○壬午諭內閣辭執中編造妖言一案著派軍機大臣會同宗人府刑部嚴行審訊並著原奏此案之給事中德奎曹林堅一併會審辦理○甲申諭內閣御史端昌奏舉劾覈實一摺督撫薦舉甄別原以激勵人材必須將舉劾各員實在事

蹟詳細臚陳方足以昭懲勸嗣後著各直省督撫於大計舉劾及平時豫保並參劾之員務將該員應舉應劾實蹟詳列具奏不得以空言塞責用昭覈實而飭官方將此通諭知之○先是閩浙總督劉韻珂奏閩省釐政敝壞請豁除積欠招募殷商下部議行嗣以新商陸續倒退請著落未倒各商將原認蓬額不拘年限永遠承辦不准告退下戶部議至是議上得旨依議所有認辦各商續屆三年限滿卽令永遠接充仍著劉韻珂飭查向來一切浮費陋規徹底清釐實力裁革務使該商人漸獲餘貲自不至妄行求退並將如何裁革浮費陋規之處據實奏明以整釐綱而除錮習○丙戌諭內閣本年九月十八日恭送 宣宗成皇帝梓宮沿途地方毋庸爲朕另備御道○戊子諭內閣向來發遣軍流等犯每於經過州縣陵虐解役需索驛站甚至中途脫逃及夥劫奪犯毆差

到配後又復行兇滋事不遵約束殊堪痛恨本年閩省督撫辦理
洋盜投首一案將盜首陳雙喜等十二犯發往新疆等處安插因
思此等兇犯從前在洋擄劫勒贖抗官拒捕因悔罪投誠免其一
死已屬法外之仁儻起解後故智復萌所過地方及到配以後如
有脫逃及強橫不法情事卽著沿途各省督撫伊犁將軍烏嚕木
齊都統一面奏聞一面從重辦理此外各省發遣重犯沿途及配
所均當實力防範一有前項情事卽行嚴拏重治其罪斷不可稍
存姑息以儆兇頑而正法紀○己丑諭內閣據恭理喪儀王大臣
等合詞奏懇奉移 宣宗成皇帝梓宮請朕準禮節勞仍步送至
紅橋一摺朕受 皇考顧復深恩哀思罔極卽照前旨步送至南
海淀亦豈足以盡依戀之忱且朕年力方強雖積哀之餘自揣精
力步履尙不至過形勞瘁今王大臣等諄詞籲懇若依所請祇送

至紅橋而止朕心實所難安惟念從前奉移 皇祖仁宗睿皇帝
梓宮時曾奉 皇考諭旨步送至阜城門嗣因王大臣合詞籲懇
請仍 躬親步送至地安門外敬溯 舊儀朕亦不敢過禮此次
奉移 皇考梓宮朕當步送至恩佑寺恩慕寺之南跪俟 靈輦
經過再由閒道先赴大營祇候跪迎藉以少伸哀慕王大臣等不
必再行瀆請○庚寅兩廣總督徐廣縉廣東巡撫葉名琛奏查教
匪會匪他省情形 臣等未知其詳而廣東廣西則數年以來悉心
探訪尙知其情偽該匪祖孫習傳師徒授受雖遇案懲辦而由來
既久根蒂過深梗頑不化竟若性成惟莠民妄言禍福煽惑鄉里
成羣結黨玩法營私誠爲罪不容誅至良懦之民無能畏事或薄
田自種或微貲營生既慮其尋釁滋擾復恐其犯案仇攀名爲入
會實以免禍若持之過急眞匪譸張爲幻多術藏身而良懦者登

然無知每易弋獲不但激而生變且恐多所株連是查辦之時既未便輕率而推原其始似應有區分也臣等既確有見聞不敢稍涉欺飾報聞○是月緩徵山東濟甯等四十三州縣衛風災旱災新舊額賦

東華續錄

咸豐四

臣王先謙敬編

臣陶澐宣恭校

秋七月辛卯朔諭內閣徐廣縉葉名琛奏兵勇殲斃匪徒並生擒首犯一摺廣西匪徒李士奎等竄至廣東廉州府屬分出滋擾經該省鎮道各員率帶弁兵督同合浦靈山兩縣紳士練勇將首犯李士奎擒獲所有該兩縣紳勇實心捍禦奮勇可嘉著徐廣縉查明奏懇恩施分別獎卹近年兩粵毗連地方匪徒疊出肆擾分遣夥匪打單嚇詐焚掠姦淫無惡不作實堪痛恨若不大加懲辦何以戢兇暴而安善良著廣東廣西督撫督率鎮道等嚴飭兵弁合力兜擒並激勵紳勇隨地隨時設法搜緝無令稍畱餘孽擾害閭閻方不負朕委任○諭軍機大臣等安徽布政使蔣文慶奏夷務

仍宜修備等語海疆防範不容少疏如該藩司所奏無事之時沿海各營將備弁兵於海洋必親習風濤於礮火必親習點放於船隻器械火藥必力求堅緻精利日日訓練講求而其最要尤在沿海各郡守牧令平時與紳民講求聯絡力行團練之法並稱各省巡道似可做照臺灣定制凡海疆道府皆得與聞兵事以期緩急易於措手等語著各該督撫按照該藩司原奏就地方情形悉心體察認真籌辦總期海防嚴密民氣奮興無事則相安有事則相衛先聲可奪眾志成城方爲克盡職守其各該省如何酌覈妥辦並道府與聞兵事果否可行之處著一併籌議具奏原片著鈔給閱看將此各諭令知之○撫恤安徽霍山望江二縣被水災民○癸巳兩廣總督徐廣縉等奏叻按北行早與各夷商熟籌密計愈稱廣東官民一氣眾志成城上年甫經照會不復辯論此事勢難

反覆何必再申前說互相推諉不作主意而咬咬總以該國既有來文若不能投遞恐無顏以對巴酋是以不得已必須遣人赴津投文伊專在上海候信方見盡心盡力見在來文既由江蘇轉奏又專人赴津復求呈遞且業經大學士穆彰阿耆英移咨兩江督臣陸建瀛據理傳知可見勢有難行並非彼之不辦該酋儘可卸責似不至鋌而走險況從前屢次稱兵全賴眾夷商簽費今夷商既不附和卽有妄念亦恐力有未逮且粵省新茶雲集將次開盤正貿易興旺之時各國商人皆出貲本誰肯以必不可行之事再至停貿虧貲甘蹈覆轍總之閒諜雖已常通而防維不可不豫上年籌備舊規一切具在不至臨事周章得旨仍遵前旨妥爲控馭密查情形隨時具奏○乙未諭內閣吳文鎔奏海塘缺口陸續刷寬趕緊搶築等語據稱西防廳屬海塘缺口續又刷寬十餘丈見

在廣集人夫晝夜搶築著該撫督率工員加緊搶辦剋期堵合以贖前愆至附近之仁和海甯二州縣沿河低窪村莊田廬被淹著卽確切勘明妥爲安撫無令失所○諭程裔采張日畧奏思茅邊外遊匪滋擾車里土境沿及近甲猛地調集兵練堵剿一摺據稱沿邊土境蠻觸相爭事所時有向係責令猛弁集練擒捕鄰封土弁策應今該匪等滋擾土境竟至沿及近甲猛地逼近茶山經官兵防堵膽敢恃眾抗拒戕斃員弁實屬膽不畏法見據該督等派員鎮道等調集弁兵馳往兜捕並飭各猛土弁合力堵截務期悉數殲除淨絕根株迅速蕝事毋任遷延見獲匪犯尤須嚴切根究務得確情盡法懲治○丙申以肅順爲內閣學士由乾清門侍衛遷○戊戌禮部奏文舉人承襲世管佐領文璣引案呈請會試可否准行得旨承襲世管佐領文舉人文璣有掌管圖記之責與閒散世職

不同所有呈請一體會試之處著不准行○國子監祭酒勝保奏
辭執中編造妖言一案書寫悖逆言語妄談禍福因而道路聞傳
人心聳動開茲徒玩法之漸啟愚民藐上之心至其牽涉大員醫
術惑眾猶屬案中枝節異端爲邪教所由開妖言爲叛逆所自始
光天化日之下固不慮其惑世誣民而履霜堅冰不可不防其漸
得旨此摺深合今日之案情著見審之王大臣公同閱看務期無
枉無縱執法公平爾等身受厚恩斷不能稍有回護然認真訊究
何難水落石出夫懲惡勸善國家之大經也卿等慎之○己亥諭
內閣吳文鎔奏海塘缺口見已堵合並下游州縣尙無被淹一摺
此次浙江海塘石工衝缺六十餘丈續又將搶作土塘衝缺過水
吳文鎔等未能先事豫防前經降旨將該撫照部議革職畱任並
飭查道廳等員職名送部覆議茲據奏衝缺口門剋期堵合辦理

尙爲迅速下游亦無被淹受害處所所有該撫革職畱任處分著
加恩開復其道廳等員應得處分亦著加恩一併寬免又另片奏
見籌塘工大概情形其應如何遵委賢能籌款佐辦之處著該撫
等迅卽通盤籌畫悉心妥議具奏○辛丑諭內閣工部奏成造鹵
簿需用金件一摺所有金繖頂金龍頭金鈴及旗繖頂肩頁纛頂
俱著遵前奉 諭旨改用黃銅其受戟旗槍等件著仍用鍍銀金
○癸卯諭內閣陸建瀛楊以增奏淮揚運河水勢有盈無絀無庸
議挑一摺前因楊殿邦奏該處水淺漕船均須起剝特降旨令陸
建瀛等飭屬挑撈茲據該督等查明見在毫無淺阻運河一律深
通惟前因江西各幫行抵瓜州爲日已遲咨商漕臣提前趕灌二
塘北上楊殿邦未允以致轉多守候等語所有見已駛到清江之
湖南尾幫著陸建瀛楊殿邦楊以增嚴飭所屬剋期灌放催趲北

上不得推諉遷延再滋貽誤該督等皆 皇考簡用大臣河漕事宜關繫甚重宜如何和衷共濟悉心籌畫俾河工不至糜費而天庾無誤正供乃該督等各執己見動輒齟齬運弁以河道淤淺爲詞工員以船身笨重爲說該督等輕聽偏信遽以入奏殊非公忠體國之道陸建瀛楊殿邦楊以增均著傳旨嚴行申飭○諭吳文鎔奏塘工復被衝塌見在設法搶護一摺據稱西防廳屬呂字號土塘缺口經堵合後並無蟄損復於六月三十日夜間潮汛猛烈將調字號已成埽工塌開十丈有奇水勢下注等語見在秋潮正旺必應加意防護著該撫迅卽督飭工員多備料物剋期堵合無稍遲延貽誤其前次堵合之缺口並飭設法保衛勿令掣動塌損下游被淹地方是否不致較前寬廣亦著確切查明妥速辦理○諭軍機大臣等據鄭祖琛奏越南國王阮福時因先後奉到 孝

和睿皇后 宣宗成皇帝遺詔擬請遣使恭進香禮並進香品祭
物又齋遞表文方物慶賀登極等語越南國備列藩封虔修職貢
今該王阮福時以接奉 遺詔欲遣使臣遠來進香自係出於至
誠惟是 孝和睿皇后梓宮已於本年三月內奉移 山陵 宣
宗成皇帝梓宮亦擇於本年九月內奉移 慕陵該國王遣使進
香已在奉移之後不及恭薦著該督撫卽行知該國王令其不必
遣使遠來進香其慶賀登極方物亦無庸呈進以示懷柔藩服至
意將此諭令知之○乙巳 上詣正大光明殿 宣宗成皇帝几
筵前行中元大祭禮○諭軍機大臣等駱秉章奏廣東匪徒滋事
鄰近湖南地方見派文武大員防堵一摺廣東英德一帶賊匪聚
集多人戕官滋擾並有欲往湖南之語湖南之永州郴州桂陽等
府州所屬多與廣東廣西連界該匪等一經粵省官兵兜捕勢必

竄入楚境況見在該匪踞住之里松墟市卽距江華縣濠界卡所
僅止五十餘里堵截尤關喫緊該撫務卽督飭鎮道管帶兵勇於
毗連各要隘處所嚴密堵禦加意巡防並飭各屬士民互相保衛
遇有賊匪竄入立即兜拏解究總期官民聯絡防守森嚴俾匪徒
無隙可乘方免蔓延貽患楚省甫當勦捕之餘地方已不堪擾累
萬難任其再肆蹂躪該撫宜如何盡心籌防以副委任耶懷之愼
之將此諭令知之○丙午以故禮親王全齡子世鐸襲爵○戊申
封 皇貴太妃弟刑部員外郎恩齡二等子爵○壬子諭內閣前
據御史陶恩培奏盛京地方捕務廢弛疊出搶劫重案當交該將
軍府尹認真查辦茲據奕興等覆奏委員分途訪查各案與該御
史原奏大略相符雖經各該地方官詳報有案並獲犯解審而逸
犯尙多未獲所有已屆疏防限滿各員應卽照例分別題參其緝

捕不力之小凌河管界佐領常祿錦縣知縣周良卿均著交部議處未獲各犯仍飭嚴密查拏務獲歸案究辦盛京爲根本重地該將軍府尹務必隨時認真整頓嚴飭地方文武各員實力緝捕勿令盜風日熾方爲不負委任至復州城守尉春英於家人劉成拐騙銀物捏詞報劫旋即潛逃未能即時弋獲實難辭咎春英著交部議處仍飭嚴緝劉成獲案究訊確情照例懲辦再據奏稱復州城東栗子寺地方閒有回民潛住山內業經查拏驅逐仍著嚴飭該界官常川稽察不准容畱匪類盤踞滋擾其七道嶺盜窩既據查明係在熱河朝陽縣界內著熱河都統惟勤迅速查明窩盜處所嚴密緝拏悉數弋獲懲辦以肅捕務而靖地方○癸丑賞已革輔國公綿性三等侍衛在大門上行走○乙卯劉韻珂徐繼畬奏英國人租賃福建省城之神光寺侯官縣知縣違將租約用印土

民晏次呈控並公給英人書信勸阻見經設法籌辦 上諭軍機大臣等通商定約原期兩安若辦理稍有偏倚必致激成事端惟當恪守成約不惟城內房屋未便聽其居住卽城外租賃地方亦須查照成約妥爲安置儻成約之外稍爲遷就民心不服卽有後患該督等務使民心共順方爲久遠之計地方官查有辦理不善之處卽遵前旨嚴行參辦勿稍回護至所稱欲求採購臺灣雞籠山煤炭一節該督等以不應違約正詞拒絕自是正辦仍當密飭文武加意防備切勿稍存大意致有疏虞將此諭令知之○丙辰諭內閣此案辭執中以道士屢次改名易裝藉醫招搖行蹤詭秘到處煽惑人心所寫書信擅議時政妄談休咎情詞尤爲狂悖卽立正典刑亦屬罪無可逭惟念朕御極之初法外施仁稍從末減辭執中著從寬定爲斬監候秋後處決仍著刑部隨時查察如該

犯在監復有不法情事卽行奏明正法已革效力雲騎尉李若昌經文慶委令查拏知而不捕著照部議杖一百徒三年宗室奕紀以已革大員疊經獲咎釋回乃復不知自愛輒從辭執中學習坐靜按摩工夫復聽其在伊家求雨實屬任意妄爲著照宗人府所擬實發吉林交該將軍嚴加管束已革御史謝榮埭以風憲官吏輒與辭執中講求坐靜工夫並有往來投契字蹟實屬不自檢束已革候補通判葉延樞與辭執中講求坐靜工夫時相往來實屬比匪該二員業已革職均毋庸議吏部尙書文慶延請該犯治病學習按摩身任步軍統領與戶部侍郎左翼總兵福濟旣察知該犯詭秘情形商同飭拏何不立時緝獲究辦其回奏不實不盡之處姑弗深究卽此遷延疏縱均屬有乖職守護軍統領豐紳前在新疆辦事大臣任內旣因該犯講按摩法募給銀兩到京後復與

見面二次且回奏亦甚含混文慶福濟豐紳均身受重恩不知自愛若不立予罷斥何以飭官方而儆將來著一併革職毋庸再交部議頭等侍衛宗室海枚身任邊陲大員既知前在土魯番該犯登塔招搖無難立即拏獲到京後該犯屢次往找並不呈送究辦實屬糊塗荒謬亦著照宗人府所擬卽行革職仍罰養贍銀一年刑部主事載鏗屢聽辭執中講說坐靜工夫盛京刑部郎中長啟令辭執中用藥治病並代覓鋪房幫給銀兩均有不合著與接收辭執中書信對聯隨卽燒燬之文舉人宗室豫章一併交部分別議處餘俱照刑部所擬辦理○徐廣縉葉名琛奏改設回香港後連日在港與商人私議福建港口虧折甚多思換臺灣作爲港口奏入諭徐廣縉等據約駁斥劉韻珂等加意防範○調柏葰爲吏部尙書以裕誠爲兵部尙書

前任成
部將軍

○丁巳調恆毓爲盛京戶部

侍郎廣林爲盛京兵部侍郎以耆瑞爲盛京禮部侍郎

由杭州副都統遷

○戊午熱河總管經文圖毓祺奏熱河

綏成殿供奉

聖容應

辦工程得旨著總管內務府大臣派員敬謹勘辦

八月庚申朔除江蘇金山縣坍沒田賦○辛酉浙江巡撫吳文鎔

奏海塘續塌埽工業已堵合得旨仍應妥慎防護無稍疏懈○壬

戌諭內閣通政司參議齊承彥奏請將特旨交辦事件附入月摺

奏報等語直省大吏原有興利除弊之責於地方要務平日自當

講求整頓遇有特旨交辦事件尤應實力奉行即使辦理稍有窒

礙亦應酌覈情形據實具奏若奉到諭旨徒以通行了事何以收

實效而專責成嗣後各該督撫於一切條陳交辦之事務將已否

舉行及行之有無成效隨時覆奏其有奉行不力之員亦著隨時

參處斷不准經年累月任意積壓自取愆尤至該參議請令附入

月摺覆奏之處日久轉成具文著毋庸議○諭前據給事中黃兆麟候補四品京堂李純先後奏稱廣西盜匪充斥屢經降旨交該撫嚴拏懲辦茲據鄭祖琛覆奏查明原奏各案獲犯究辦並屢次擒獲首夥要犯多名見在督飭文武各員分投拏辦情形各一摺比年廣西盜風日熾雖屢經懲辦而匪徒仍復結夥肆行此拏彼竄若不大加懲創何以戢姦暴而衛民生該撫議請責成各道府會營分投嚴拏各章程均著照所請行該撫仍當會同提督嚴飭鎮道等督率各屬晝夜巡防並勸諭紳民團練保衛遇有賊盜竊發總當不分畛域合力兜拏不得以業經拏獲多名稍形鬆懈其劫案內逸犯必應按名捕獲盡法懲治勿畱餘孽致貽後患○劉韻珂徐繼畬奏遵查洋船自上海起碇後未至福廈兩口業經密飭嚴防並英國人租賃神光寺房屋講經行醫兩人見雖同住而

不時爭論其勢似難久處見在相機勸諭上諭軍機大臣等該督等正可乘勢開導務令及早遷移俾各紳士等均無異詞而民心亦可安帖總之海疆要地權其輕重寬猛兼施該督等身膺重寄惟當遵奉前旨平心籌辦懷之慎之將此諭令知之○癸亥諭內閣鄭祖琛奏請將剿捕未能迅速之都司革職等語此次廣東英德賊匪竄至廣西賀縣境內經該縣知縣鶴年捐貲練勇力圖守禦乃該署都司李慶什明知賊已入境輒以守城爲詞並不下鄉堵捕迨該縣鶴年自縊之後盜匪尙在縣境該署都司仍復藉口兵單延不進剿以致賊匪竄逸李慶什庸懦無能著卽先行革職並著鄭祖琛確查該縣鶴年如因李慶什遷延退縮以致戰守無據愁急自盡其情殊堪憫惻李慶什亦豈革職所能蔽辜事關地方官保衛城池營員畏葸掣肘必應徹底根究明示懲勸斷不

可稍涉瞻徇○以張亮基爲雲南巡撫徐有壬爲雲南布政使呂

佺孫爲四川按察使

由廣東高廉道遷

○甲子諭內閣大理寺卿邵燦奏

漕政亟宜整頓一摺漕糧自開兌以迄驗收例有常則立法極爲周密無如奉行日久率皆視爲具文以致諸弊叢生如所奏州縣浮勒弁丁需索以致漕船捏報開行任意逗遛又江廣幫船近多全數起卸船戶得以偷盜攪雜又委員索取陋規水手訛索滋事種種弊端雖屢經申諭嚴禁而相沿已久積習迄未肅除著有漕各督撫及漕運總督加意稽查認真整頓總期開行依限起卸如期裁冗員以杜需索懲水手以儆刁頑庶使弊竇不生丁胥知畏以肅漕政而裕正供○命甘肅按察使明誼解任候質○丁卯鄭祖琛閔正鳳奏象州賊匪於七月十九日竄入平樂府屬修仁縣境因城角缺口擁入城內拒傷委員兵壯人等又竄至荔浦地方

勢甚猖獗該二縣四通八達且距省城止二百餘里若裹脅日眾

必至滋蔓難圖

臣

見派兵前往剿捕惟該處路徑紛歧水陸隘口

均須防守本省兵力較單不敷分布必須鄰省撥兵助剿方能合

力進攻請飭督

臣

徐廣縉酌調廣東標兵一二千名迅速帶赴廣

西會合夾擊

上

諭軍機大臣等廣西盜匪充斥節經降旨責成

該撫會同該提督督飭所屬文武合力兜拏毋任此拏彼竄茲據

鄭祖琛等奏稱盜匪由象州竄入修仁縣城拒傷委員兵壯人等

又竄至荔浦地方該二縣距省僅止二百餘里亟應防其分投竄

擾該撫迅卽催提各路官兵親自帶往會同閔正鳳督飭文武員

弁分路兜剿毋令逼近省城絕其逃竄後路一面解散脅從曉諭

安撫免致愈裹愈眾滋蔓難圖將此由四百里諭令知之○諭寄

諭兩廣總督徐廣縉據鄭祖琛等奏盜匪擁入修仁縣城並竄至

荔浦逼近省垣一摺又另片奏請飭督臣迅赴粵西會剿並酌派
廣東官兵前往等語修仁荔浦兩縣城距桂林省垣甚近且係四
通八達之區深恐賊匪裹脅愈多稍事遷延卽難撲滅且粵西各
州郡匪徒竊發到處須防勾結其界連廣東各地方尤恐蔓延亟
應及早兜拏免致勞師糜餉該督前經奉 旨校閱營伍應卽前
赴廣西著於接奉此旨後迅赴廣西會同鄭祖琛閔正鳳督飭文
武員弁不分畛域合力勦辦並先酌調廣東各標官兵一二千名
派員管帶分起兼程前往會剿所有應用軍需著該督卽行籌畫
撥解以資調用至廣東勦捕盜匪亦關緊要該督務當通籌兩省
情形合力會剿不可顧此失彼是爲至要將此由四百里諭令知
之○諭前任雲南提督張必祿由京回籍見在行抵何處著徐澤
醇迅卽查明傳旨飭令該提督馳驛前往廣西會同徐廣緒鄭祖

琛等勦辦盜匪得稍有遲誤將此由四百里諭令知之○戊辰
祭大社大稷○己巳諭軍機大臣等昨據鄭祖琛等馳奏盜
匪擁入修仁縣城並竄至荔浦逼近城垣當降旨令鄭祖琛親往
督辦並飭徐廣縉酌帶廣東官兵一二千名迅往會勦兼令徐
醇傳諭張必祿馳赴廣西會同勦捕矣茲據駱秉章奏接准廣東
咨開英德一帶賊匪四散首逆李元寶亮已經拏獲並探得各匪
黨竄至懷集縣交界之南豐地方距廣西賀縣三百餘里距湖南
境五百餘里見飭文武兵勇實力嚴防等語英德匪徒雖漸逃散
而修仁等處勢更猖獗著駱秉章迅飭所屬於粵楚交界處所扼
要防範毋任賊黨竄入越界肆擾並飭邊界各員如果迎勦得手
卽當不分畛域相機追捕以期速卽殲滅向榮前已有旨調任固
原提督約計此時尙未起程著卽選派官兵馳赴湖南邊界督同

防勦俟余萬清接任湖南提督時儻廣西賊匪尚未淨盡卽著向榮馳赴廣西併力勦辦毋稍遲誤將此各諭令知之○諭貴州巡撫喬用遷飭屬嚴防竄匪○庚午鄭祖琛閔正鳳奏連日探報賊由修仁竄至荔浦數日內連陷兩城肆行滋擾該處與陽朔交界距省甚近路徑紛歧亟須嚴密堵禦臣祖琛出省相度地勢擇要扼紮一面勸諭紳團協力防守一面督率兵勇實力進攻惟又接據柳州等處稟報右江各屬盜風四起股數甚多本省兵力本單各處紛紛告警籌防籌勦實有顧此失彼之虞應請鄰近省分選派得力兵勇迅速來援勦辦方易得手至此次賊匪竄入荔浦縣城雖據該署知縣薩畢圖稟稱該員探聞賊匪將近卽親赴各鄉招集團練致令賊匪倉卒入城究屬疏於防範應請旨先行革職以示懲儆至該員所稱是否屬實及修荔兩縣文武下落容查明

再行辦理

上諭軍機大臣等前經降旨令徐廣縉迅赴廣西並

調撥廣東官兵一二千名會剿賊匪籌發軍餉接濟兼令張必祿
自川馳往會同剿辦昨又諭令駱秉章喬用遷於楚黔兩省界連
廣西處所一體嚴防迎剿並諭向榮於楚匪肅清後馳赴廣西會
辦矣茲據鄭祖琛等馳奏盜匪竄至荔浦入城滋擾一招又片奏
右江各屬盜風四起並請撥餉等語賊匪於數日之內竄擾修仁
荔浦兩城實堪忿恨該撫見已出省親往督剿計徐廣縉接奉前
旨亦當兼程馳往著卽督率在事文武激勵將士奮力攻剿四面
兜捕該處距省垣甚近萬不可再令分竄致有疏虞該匪等股數
不一同時並發必有渠魁詭謀分我兵力惟須先行訪明盜首何
人設法擒獲並廣張告諭懸賞購緝散其黨與自可一股成擒該
省兵力較單若待鄰省紛紛徵調誠恐緩不濟急該督撫務

導本處紳民互相團練藉資捍禦必須剴切詳明鼓其忠義之氣
其有固守城鄉俾賊匪無從竄越或能奮勇殺賊斬賊立功者卽
著該督撫破格奏請施恩從優獎敘庶兵民協力同心賊匪速就
殲滅儻因兵少盜多分剿不及卽著飛咨貴州酌調官兵赴粵協
剿該督撫於剿辦修仁荔浦賊匪時仍當嚴飭各路文武員弁探
明賊匪股數其盜首潛藏何股分投兜剿併力殲擒毋令彼此竄
突勾結致釀巨患所有剿捕楚匪案內撥解廣東銀十萬兩仍著
徐廣縉葉名琛籌款解赴廣西以濟支發署荔浦縣知縣薩畢圖
據稱赴鄉集團堵禦致盜匪倉卒入城著先行革職交該督等查
明是否屬實再行覈辦修仁荔浦兩縣查無下落文武各官卽著
迅速查明具奏將此由四百里各諭令知之○論有人奏廣西提
督閔正鳳係由武巡捕出身專講應酬於紀律運籌一無所知駐

紫柳州按兵不出賊匪偏近府城住及一月目無提督可知等語
著徐廣縉秉公確查該提督於土匪肆擾之時如果縱賊養寇畏
葷無能卽行據實嚴參懲辦毋稍瞻徇至所稱兩廣土匪日熾分
夥勾結至二萬餘人之多若不及早撲滅勢恐滋蔓難圖該督務
當通盤籌畫迅速剿辦其團練保甲諸事宜尤應隨地布置使賊
匪不敢肆行庶不至釀成巨患原摺著鈔給閱看將此諭令知之
○辛未諭軍機大臣等有人奏陝西延榆綏道萬保逗遛省垣營
謀鑽刺該撫張祥河詩酒風流不理公事等語該道因何盤踞省
城總不赴任其所屬公事如何廢弛其三次署理糧道如何營私
取巧該撫不理公事是否確實著琦善悉心查訪秉公據實具奏
毋稍徇隱原片著鈔給閱看將此密諭知之尋奏張祥河並無延
誤公事萬保不免藉端逗遛得旨陝西延榆綏道萬保著以內務

府郎中候補○壬申諭內閣前據陸建瀛奏湖北鹽法道鄒之玉不遵永禁整輪辦法仍令各商板提售價以致存鹽滯銷當經降旨交裕泰嚴查參辦茲據該督奏稱該道因各商減價速售諭令兼顧商本係在未奉奏定新章以前迫接奉新章卽督飭岸商趕銷存河舊鹽尙無不遵永禁整輪辦法及拘執板價情事惟於各商減價之際僅諭令兼顧商本並不稟商該管總督及兩江總督覈辦實屬疏忽鄒之玉著交部議處○諭顏以煥奏趕催漕船等語本年南糧各幫二三塘灌放渡黃已形遲滯若再耽延水勢益消必致有淺阻之虞著漕運總督嚴催各幫趕緊趕行連檣北上並著該河督及沿途各督撫嚴飭該管道廳及司漕文武員弁星夜趕催不准片刻停畱致誤回空期限○諭向來各衙門書吏因承辦稿件往往藉端詐騙影射婪贓種種作奸犯科雖經重懲嚴

辦無如此輩積習相沿惟利是圖肆無忌憚卽如刑部見審之書吏陳鴻輒敢寄信外省任意索詐此外未經破案者尙不知凡幾若不隨時查察何以儆貪蠹而杜弊端嗣後著責成各部院堂官嚴飭司員認真查察承辦書吏儻有身後辦事及指騙訛索等情一露端倪立即回堂究辦庶鬼蜮技窮不致爲若輩所蒙蔽也將此通諭知之○甲戌諭內閣載銓等奏宗人府庫款足敷支放請照舊制量給宗室覺羅等繼娶妻室恩賞銀兩又片奏添給盛京宗室覺羅等紅白恩賞銀兩各等語嗣後宗室覺羅等繼娶妻室紅白恩賞銀兩著卽照載銓等酌擬減給之數給與○諭軍機大臣等本日據訥爾經額奏兩奉廷寄體察海防情形繪圖呈覽並遵旨議覆海防事宜各一摺周天爵先後陳奏兵事數條並繪具圖樣之處旣據該督悉心體察不敢輕於一試自係酌覈地方情

形確有把握又據奏稱蔣文慶所陳均在疊次籌防暨善後章程之中等語天津爲京師屏障自當以嚴防海口賊不敢來來不敢入爲扼要之圖尤須密籌後路使賊匪無從繞越各口聲勢相應固我藩籬該督旣稱津沽地利情形久在心目是平時早有籌畫不至臨事張皇見在該處人心堅定志切同仇該督惟當督飭鎮道聯絡兵民訓練必勤礮械必備自足常操勝算慎固疆圉原不在紛更煩擾爲也將此諭令知之○丙子諭內閣前據薩迎阿奕山穆特布明白回奏各摺當交刑部查覈茲據該部提犯研訊覈與原奏相符薩迎阿等延請辭執中治病講論按摩工夫並各布施銀兩雖在該犯未曾改名易裝之先究有不合薩迎阿奕山穆特布著一併交兵部議處尋議降三級調用得旨改爲降四級畱任○首逆李沅發伏法○庚辰以宣宗成皇帝梓宮奉移山

陵免經過之易州等六州縣本年額賦○壬午以陳旰爲江西巡

撫武棠爲江蘇布政使調孔慶瑚爲貴州按察使以多慧爲山西

按察使

由冀甯道遷

○癸未以車克慎爲工部左侍郎邵燦爲內閣學

士萬貢珍爲大理寺卿祁宿藻爲湖南布政使崔侗爲廣東按察

使

由南韶連道遷

○張雲藻以病免調勞崇光爲廣西布政使常大滄爲

湖北布政使以雲麟爲陝西布政使

前廣西布政使

○甲申鄭祖琛閔正

鳳奏賊擾修仁荔浦經官兵圍剿旋退出踞守青山復竄修仁荔

浦所屬四排地方勢極糾紛必應四面兜剿遏其奔突之路方可

聚而殲旃

臣

祖琛見駐平樂府城居中調度一面激勵將士紳勇

合力兜擒兼顧省防其上林明江武緣等處盜匪滋擾並分派弁

兵勦捕至修仁荔浦文武各員當賊匪竄近各該縣時並未先事

豫防設法堵禦致令賊匪先後竄入城內肆行滋擾實屬咎無可

辭相應請旨將署修仁縣知縣劉益謨典史鍾壽森荔浦典史梁虹把總郭維先外委蘇紹英嚴正榮俱革職畱於軍營效力上諭軍機大臣等該撫見駐平樂府城居中調度計徐廣縉張必祿向榮先後接奉諭旨亦均可馳赴軍營著卽會商督飭文武員弁激勵將士紳勇合力兜擒其已經退出之兩縣地方務卽剴諭紳民妥爲安撫互相守助俾該匪不敢復行竄入並飭各路官兵奮力直前將青山賊巢埽穴擒渠密探股首姓名懸賞購獲一面解散脅從使賊首尾不能相應毋致此拏彼竄平樂近接省城尤爲緊要如果兵力不敷調遣前飭酌調貴州官兵之處該撫迅卽飛調協防毋誤事機其思恩太平等屬賊匪股數更多尤當及早剿捕向榮旣已調授廣西提督卽將廣西各路形勢通盤籌畫與徐廣縉鄭祖琛等和衷商辦若將備中有臨事畏葸藉詞推諉者立

卽執法從事毋稍姑容以作士氣而懲積習總期周密無遺該匪
無從乘閒竄突並飛咨貴州湖南各省於交界處所堵禦勿令蔓
延並嚴飭各土司認真協捕以期速就殲擒閔正鳳仍著畱於廣
西襄辦軍務事竣後再赴調任所有賊匪入境防範不嚴致任竄
入城內之署廣西修仁縣知縣劉益謨典史鍾壽森荔浦縣典史
梁虹把總郭維先外委蘇紹英代防荔浦汛外委嚴正榮均著卽
革職隨營效力將此由五百里各諭令知之○命前任工部尙書
廖鴻奎以四品京堂候補充 實錄館總裁官○雲麟以病免以
朱履爲陝西布政使調多慧爲陝西按察使賞福濟四品頂帶畱
山西按察使已革戶部
右侍郎○調陝西提督向榮爲廣西提督廣西提
督閔正鳳爲陝西提督仍畱廣西襄辦軍務○以貴州擒獲鎮遠
苗匪賞知府胡林翼花翎餘升敘有差○丙戌諭內閣潘鐸奏審

明京控案件按例定擬一摺著交刑部議奏朕思各省糾眾滋事搶奪斃命重案層見疊出屢經言官陳奏降旨嚴飭查辦卽如潘鐸審擬劉小成京控王太香一案糾眾擅帶火藥燒斃八名之多該地方官平日果能密訪嚴拏何至任令捻匪肆行兇暴至於此極一省如此他省可知著各直省督撫嚴飭所屬於地方土棍匪徒及鄰省滙入盜匪隨時查拏認真整頓遇有糾眾滋事重案立卽擒獲嚴加懲辦俾兇頑知儆不至肆無忌憚儻地方文武員弁容隱捏飾化大爲小化有爲無該上司一經查出或被人控告必當據實嚴參斷不准稍事姑容致釀巨案至河南捻匪結黨成羣尤爲地方之害甚至竄入鄰省劫掠橫行該督撫自應不分畛域隨時嚴捕以期淨絕根株封疆大吏除莠安良是其專責若寬縱於事前復彌縫於案後以致盜風日熾擾害閭閻其平時廢弛因

循諒亦難逃朕鑒自此次諄諭之後再有仍前怠玩不知振作者

經朕訪聞得實惟有將該督撫等從重治罪決不寬貸以爲玩視

捕務者戒懍之愼之將此通諭知之○以陸元烺署江西巡撫

政使○丁亥諭內閣向例推恩襲爵之人罪至革爵者不准承襲

從前和世泰外任將軍獲咎革去公爵其應否承襲 皇考諭令

該旗候旨辦理仰惟 聖意亦欲從緩加恩朕追思 孝和睿皇

后母家尙未襲封有人敬體 皇考諭令候旨之意和世泰之子

崇恩著加恩准襲承恩侯爵其敬愼從公以保祿位毋忝朕命○

戊子都察院奏據廣西南甯柳州潯州梧州思恩等府舉人李宜

用等遣抱告何達以逆匪蝟起到處攻劫見在民不聊生紛紛逃

散等詞赴臣衙門具控據稱近年以來慘遭匪毒自上年四月至

本年五月匪首張家祥楊撈家等搶劫南甯府左江柳州府右江

等處以及桂林府灘江一帶均受毒害首領數百人賊皆用紅布包頭所豎旗幟上有替天行道等字樣槍礮器械馬匹俱全到處焚劫村莊搶掠財物淫汙婦女稟報各上憲不過委員查看情形或發兵一二百名探賊蹤跡致匪勢愈張官員被戕居民先後被劫數萬餘家又據慶遠紳士莫子升等遣抱告莫有發以逆匪肆劫等詞具控據稱匪首陳亞潰暨黃四張亞珍文亞英嚴亞汶等各擁眾數千劫掠村墟典當殺斃男婦人口不計其數雖經宜山縣率團生擒匪首生員詹德剛一名見因兵少匪多屢禦屢潰公請設法剿滅又據南甯府宣化縣生員何可元以逆匪絕產斃命等詞具控據稱上年十一月被匪劫擄四次燒屋斃命兵差畏緝見在外匪句連土匪日甚一日縣內被劫二百餘村被殺二百餘命婦女被掠一百餘人所到之處旗號悖逆等語案關逆匪橫行

延及七府一州種種不法若不及早剷除恐脅從日眾滋蔓難圖
大爲邊省地方之害 上諭軍機大臣等據都察院奏廣西舉人
李宜用紳士莫子升等各遣抱呈訴並生員何可元自行呈控逆
匪橫行各情並著徐廣縉等按照原呈及鈔單所開案由姓名確
切查明指名嚴拏斷不可稍有回護該舉人等原呈並鈔單均著
鈔給閱看將此由四百里諭令知之

東華續錄

咸豐五

臣王先謙敬編

臣陶澐宣恭校

九月庚寅諭內閣通政司副使扎克丹奏請仍設巡漕御史一摺
科道巡漕舊例久經停止道光十九年該員御史任內曾請復設
欽奉 皇考宣宗成皇帝諭旨此項差使裁撤已久著毋庸議扎
克丹以必不可復之事又行陳奏實屬不知事體見今河漕諸臣
本屬不能和衷共濟然操縱之權惟朕持之何得輕議紛更沽名
市譽況省事不如省官徒滋流弊著不准行○諭軍機大臣等徐
廣縉葉名琛奏接奉廷寄查辦盜匪情形並游匪滋擾見經提督
臬司前往會剿各一摺又片奏軍務緊要請畱應行引見知府暫
緩送部等語兩廣盜匪充斥前有人奏種種擾害情形當經降旨

飭令認真查拏並籌議團練壯勇茲據奏稱原摺內開之匪黨李
自葵等各股業經先後殲擒惟首犯方晚等尙未就獲仍著嚴飭
搜捕至擄人勒贖分界打單之風深堪痛恨不得因拏辦多案遂
謂其勢漸熄致涉鬆懈該督等惟當通飭州縣卽照廣西省橫州
博白兩處團練章程認真辦理俾官民合力同心不至互相推諉
方於捕務有裨其游匪竄擾南韶等屬雖經各縣營先後獲犯三
百餘名該匪餘黨復敢糾約大肆披猖致將武職大員圍困不法
已極必應痛加剿洗見經提督祥麟臬司祁宿藻督帶兵勇馳往
剿辦該督等務令嚴飭毗連各縣營併力防堵以期四面兜擒分
其黨與勿令兩省賊匪互相勾結所稱副將王淩受困不知下落
是否陣亡並著該督等確查具奏臬司祁宿藻見已升任湖南藩
司著俟剿辦事竣再行奏明請旨至應行引見之南雄州直隸州

知州郭超凡候補知府史樸見據隨營差遣均著准其暫緩來京引見該督見赴廣西會剿務須通籌兩省全局知人善任懲勸兼施俾地方迅就肅清勿致顧此失彼是爲至要將此由四百里諭令知之○壬辰諭內閣御史文光奏請飭查禁貪污一摺據稱直隸易州知州朱家學署內有書吏胡人棟在該州署外土地祠私立銀櫃包攬租糧任意折算錢文糧銀租銀折錢俱較市價增昂該州錢糧本年三月閒降旨蠲免十分之七該書吏竟敢捏稱

梓宮經過道路兩旁三里爲度按三分蠲免餘俱照舊催徵似此蠹吏殃民該州豈竟毫無知覺若不嚴加懲辦何以除積蠹而重民生著訥爾經額提集人證徹底根究如該州有知情故縱情事著一併從嚴參辦至勒折浮收貽害閭閻恐他省亦所不免著各直省督撫隨地隨時嚴查密訪如有蠹吏貪官仍行浮收勒折一

經查出卽行參辦毋得姑息容隱將此通諭知之○諭陸建瀛傳
繩勦奏委員擒獲洋盜多名仍飭合力搜捕等語江浙洋面盜匪
潛入北洋石島等處伺劫商船經委員千總周鼐督帶兵勇在山
東省洋面先後獲盜船七起生擒盜犯三百餘名尙屬奮勇出力
該督等務當乘此剿捕得力之時督飭委員等合力搜捕總期淨
絕根株勿畱餘孽斷不可始勤終怠並著咨明山東省不分畛域
一體嚴拏毋致養癰貽患○諭軍機大臣等陸建瀛等奏俄羅斯
國李頓北船本年七月二十二日來滬寄泊海口行文英領事阿
利國轉求通商該督等以上海非俄羅斯應至之地轉飭該道查
照成案諭令回帆旋於八月十二日起碇向東南洋面駛去等語
俄羅斯國李頓北船前於道光二十八年曾至上海亦係由英領
事轉求通商經李星沅陸建瀛開導曉諭起碇出口今事隔一年

又復重來儻此次回帆以後再來嘗試該督等惟當堅守定例飭令回國並嚴禁內地民人與之交易以杜事端而免覬覦將此各諭令知之○諭上年俄羅斯頭人私入邊界阻攔查邊道路當由理藩院咨文行知該國並將咨文鈔給薩迎阿等閱看見據該國薩納特衙門咨覆稱接奉咨行後當卽札交總理迤西錫畢爾邊界之官令其查明回報俟該處查來再行咨覆並稱必不至因此事有傷和好等語所有薩納特原文著鈔給薩迎阿等閱看見在哈薩克邊外該國帶兵頭人是否業已撤回該將軍等仍當隨時密防相機妥辦俟庫倫接有續到咨覆再行飭知查照辦理將此各諭令知之○乙未徐廣縉奏准撫臣鄭祖琛來咨賊竄荔浦已催調官兵親往剿辦或可剋期撲滅惟查撫臣所奏此外有另股盜匪十數起蔓延五府一州自數百至數千人不等以臣所聞恐

股數尙不止此伏思匪股正多聚散無定全在該管府州縣營隨時隨地堅壁清野以絕其擄掠實力團練以杜其勾結殊非客兵尾追三五月間所能蒞事且廣東見值韶州廉州兩州匪徒滋事不特臣勢難帶兵久駐粵西卽東省弁兵各有該管汛守亦難終年遠出合無仰懇 天恩特簡實心任事大員馳往專駐督辦以資補救見聞匪勢甚張誠恐他股匪徒風聞東竄查廣西梧州府與平樂府接壤商賈輻輳爲東西兩省毗連喫緊之區臣見在調撥兵勇擬於八月十六日自廣東起程駐紮梧州以扼其東竄之路一面委員確探情形再行相機分投勦捕又奏西省盜風甚熾幾於徧地皆然該匪等每以數十人或二三百人爲一股所到處隨時勾結土匪共行搶擄往往土匪多於外匪數倍該管文武稟報動稱有外匪一二千人境滋擾不思匪蹤之來去視乎堵緝

之疏密平日既不知講求捕務實力團練直至外匪入境得賊遠
颺搜捕零星土匪將就粉飾了事無怪匪膽益張愈辦愈多臣自
上年間廣西地方每多不靖時加查探分別飭拏屢以公牘信函
諄致撫臣嚴飭各屬認真堵捕乃屢接撫臣來咨總若虛應故事
並無挽救真情卽疊次鈔寄會銜摺稿與臣所訪情形亦多不實
不盡今則養癰之患已成噬臍之嗟何及臣忝領連圻才難兼顧
儻稍涉瞻徇欺飾則孤恩昧良獲罪滋深 上諭軍機大臣等徐
廣縉馳奏出省堵剿匪徒一摺又片奏廣西盜匪情形並請酌撥
軍需各等語廣西盜匪蔓延五府一州疊經降旨命徐廣縉馳往
勦辦並諭張必祿前往粵西會剿兼令向榮勞崇光馳赴新任辦
理矣該匪等竄擾廣東廣西兩省股數既多自不能以土匪外匪
之眾寡強分畛域該督身任兼圻兩省事宜責無旁貸且受 皇

考宣宗成皇帝逾格厚恩錫爵酬庸自必殫竭血誠通盤籌畫以
 期賊匪速就殲滅地方一律肅清既據奏稱駐紮梧州著卽在彼
 居中調度與鄭祖琛向榮張必祿和衷商榷督同藩司勞崇光嚴
 飭文武員弁激勵將士紳民合力兜擒鄭祖琛撫粵有年未能先
 事豫防以致盜匪充斥儻不力加振作復事遷延糜餉勞師咎將
 誰執向榮接奉前旨定已星夜馳抵軍營閱正鳳俟向榮到後卽
 督來京陛見所有各股賊匪責成該督會同該巡撫提督等酌量
 兵力迅速剿捕廣西地瘠民貧不堪任其蹂躪如果廣東官兵因
 韶連兩府正須防剿卽遵前旨迅調貴州官兵協剿古州一帶與
 粵西毗連計不難兼程前進應用軍需若由部籌撥恐致遲緩著
 徐廣綰仍遵前旨迅卽由廣東籌款就近撥解銀十萬兩以濟急
 需其廣東各屬盜匪滋事仍著徐廣綰葉名琛熟籌迅辦毋得顧

此失彼朕拭目南望佇盼捷音務須首逆就擒脅從解散修仁蒞浦各縣被擾地方加意安撫並飭地方文武各弁隨時隨地堅壁清野以絕其擄掠實力團練以杜其勾結不得任令滋蔓以致曠日罔功其有平時廢弛臨事推諉及稟報不實互相蒙蔽之員著該督撫等據實嚴參具奏毋稍隱飾懷之愼之將此由四百里諭知徐廣縉鄭祖琛向榮張必祿並傳諭勞崇光知之○丙申鄭祖琛閔正鳳奏賊匪由修仁四排竄赴寨沙鹿寨等處經官軍攻剿斬殺賊夥約有二百餘人奪獲大小礮械火藥多件該匪逃竄雒容之道江運江一帶並有另股盜匪闖入遷江縣城肆行劫掠見調集兵勇分路搜捕以期速掃逆氛不敢稍涉疏懈上諭軍機大臣等該省賊勢業已蔓延卽偶獲勝仗豈遂足以挫其逆鋒著徐廣縉等仍遵前旨調派官兵分路嚴防乘機痛剿斷勿任其竄

逸句結尤須地方紳士商民協力同心庶眾志成城勦辦更可得
力著徐廣縉等出示剴切曉諭激以大義並遴派賢員廣爲勸導
如紳士商民中有能自爲團練並出貲協助有裨軍需者既可自
衛身家卽宜量爲甄敘事竣著該督撫查明奏請優加獎勵以爲
好義急公者勸所有防範不嚴致令逃匪撲入縣城之廣西遷江
縣知縣許鵬典吏孟嘉榮把總周發琪著一併革職並先經革職
之署修仁縣知縣劉益模典史鍾壽森署荔浦縣知縣薩畢圖典
史梁虹把總郭維先外委蘇紹英代防荔浦汛外委嚴正榮均不
准其畱營效力仍確查有無臨事逃避情事據實具奏將此由四
百里諭知徐廣縉鄭祖琛向榮張必祿並傳諭勞崇光知之○兵
科給事中袁甲三奏廣西盜賊充斥蠡屯蟻聚已非一年該撫鄭
祖琛事務彌縫查八月初三日該撫曾奏稱軍務告竣請俟藩司

張雲藻回任後來京陛見其去馳奏修仁荔浦等縣失守之期不過十數日如謂十數日前毫無見聞則膜視封疆形同木偶罪何可逭若明知藩司久病必難回任僅以一請塞責居心詐僞更屬不堪

臣

又伏讀八月內兩次諭旨修仁荔浦等縣文武各官暫行

革職隨營效力此係兩縣債事員弁失守城寨律有常刑不識鄭祖琛若何陳奏曲爲開脫復請隨營效力爲後日邀恩地步墮軍民之志氣長寇盜之兇威貽誤兵機莫此爲甚廣西統轄十一府今有八府紳民李宜用等航海叩關匍匐闕下則民不聊生通省糜爛已可概見可否明降諭旨嚴詰鄭祖琛秦賊釀亂之由與其前後奏詞欺飾枝梧之故並飭督

臣

徐廣緝嚴查死事諸人是否

被戕抑係畏難自盡其失守倖生之員弁不准隨營效力查明應拏問者卽予拏問應正法者卽奏請軍前正法儻該員弁於起事

之初曾經稟報該撫而該撫有抑勒不辦情事准其據實申訴大振文武積玩之心盡紓閭閻憤怒之氣雷霆一震孽蹟皆驚烏合之寇不足平也 上諭有人奏廣西巡撫鄭祖琛釀亂欺飾請嚴懲功罪一摺據稱廣西盜賊充斥該撫專務彌縫迨經參奏查問覆奏尙涉含混至失守二城以後又復將僨事員弁奏請革職隨營其八府紳民航海叩閭前此豈無見聞何以不據實奏陳種種迹近欺罔著徐廣緝按照所參各款秉公查覈據實奏參前有旨令該督確查提督閔正鳳縱賊養寇畏葸無能等情著卽將該提督如何玩誤之處一併查明嚴參毋稍瞻徇原摺著鈔給閱看將此由四百里諭令知之○調湖南貴州兵各二千名赴廣西剿賊○緩大通橋車戶應扣本年豆價並二十八年逾額掣欠銀○丁酉諭內閣吳文鎔奏大雨水漲田廬被淹塘工亦續有衝坍見飭

查勘並搶堵一摺浙省上年甫被災歉民鮮蓋藏茲復於八月中旬大雨兩晝夜低鄉田廬悉被淹浸災民難免流離殊堪憫惻著吳文鎔遴委賢員迅赴各屬確實查勘設法疏銷即將見辦情形覈實具奏其雲騰二號石塘續有衝塌十餘丈並著吳文鎔嚴飭工員多備料物趕緊將土塘口門堵築勿致潮水內灌該撫身膺疆寄值此災患頻仍宜如何盡心經理以副委任勉之慎之○御史朱應元奏請買補各省常平倉穀並嚴禁州縣侵冒勒派及丁書需索經紀把持諸弊下部議行○己亥諭內閣兵部議奏萬貢珍條陳練兵弭盜事宜一摺練兵以火器爲重弭盜以禁火器爲先私造私藏例禁至爲周密惟地方官平日疏於稽察浸至編號立冊視爲具文卽非濱海近山亦多擅製甚至不逞之徒收藏日眾轉滋事端於綏輯地方大有關係著各省督撫嚴飭所屬認真

查禁如有私藏私鑄卽照例懲辦毋得日久生懈將此通諭知之
○諭劉韻珂奏查明水陸各營並無空糧夥糧等弊一摺國家設
立營制必須一兵得一兵之用豈容影射捏冒虛糜糧餉閩浙兩
省水陸各營據稱並無空糧夥糧等弊該督仍當嚴飭各營隨時
認真挑補毋稍疏懈至各營坐支提塘及渡兵糧餉著卽照議一
律裁汰因思此等情弊他省亦所不免並著各直省督撫一體嚴
行查察如有糧餉虛占兵數缺額等弊卽嚴行禁革力加整頓其
衰庸員弁尤須隨時甄別不准稍事姑容經此次飭諭之後該督
撫等儻不能激發天良漸除積習仍復容隱欺蒙致營務日就廢
弛一經訪聞定卽重懲不貸毋謂言之不豫也懍之慎之將此通
諭知之○辛丑諭內閣廣西各屬盜匪充斥前經竄擾修仁荔浦
兩縣其另股匪徒復又闖入清江縣城各地方被其蹂躪民不聊

生朕甚憫焉業經降旨令徐廣縉帶兵馳赴廣西並起張必祿於四川調向榮爲廣西提督會同該撫鄭祖琛迅籌剿辦並傳諭湖廣貴州各督撫揀派精兵協剿惟廣東亦有游匪滋擾見經提督臬司前往剿辦儻令該督久駐粵西恐有顧此失彼之虞朕瞻懷南服民生一日不安朕心一日不釋前任雲貴總督林則徐先經疊次宣召尙未來京著卽作爲欽差大臣頒給關防馳驛迅赴廣西會同鄭祖琛向榮張必祿督率藩司勞崇光悉心剿撫徐廣縉俟林則徐到後會同周妥再回廣東專辦該省游匪其未到以前仍著徐廣縉等認真堵剿協力籌辦不得以特派有人稍存推卸之見林則徐受 皇考簡任重恩前在雲南辦理漢回軍務迅速歲事朕所素知著卽星馳就道蕩平羣醜綏靖巖疆毋違朕命○通政使羅惇衍奏廣東盜風素熾近來橫行尤甚聞本年六月有

賊數千攻圍肇慶府屬廣甯縣城該知縣賂以銀二千五百兩始行解圍聲言往英德清遠一帶七月初間直犯韶州府屬英德縣該汛千總梁恩陞帶勇抵禦被賊擄去索銀數百兩收贖又廣州府屬清遠縣水陸兩路爲行旅出入所必經賊自七月十五日爲始在各隘口設廠攔截往來船隻行李收稅賊目有陸和李和依法善黎東狗單眼德大鯉魚大頭羊等名目號爲八千子弟與廣西勾通一氣槍礮器械各極精良肆行無忌年來未聞地方官嚴辦一案馴至賊匪無所畏憚推原其故皆由提鎮賣缺肥己參遊都守扣餉虐兵府廳州縣縱盜殃民前任封疆大吏已養癰貽患今該督撫業經奏派提督臬司等官前往會剿但恐寇黨日眾官兵單弱請旨責成該督撫添兵勦捕不准一名漏網並嚴飭所屬文武員弁激發天良不分畛域盡數查拏毋稍諱飾鴻臚寺卿呂

賢基奏廣西匪徒蹂躪之區已近十分之七居民迄無安土若不亟爲撫綏孤弱者轉填溝壑強黠者竄入賊黨則爲害愈大今日平賊之法宜以保民固本爲先務安民之道無他恤死亡撫流離而已至於反側之徒譬不畏法弱肉強食誠堪痛恨業已調兵合剿方期埽盡賊氛然該省山峒繁多林箐茂密在在皆逋逃藪若分兵四出而兵力稍單則賊匪愈奔突郡縣愈殘毀臣尤慮脅從漸多滋蔓漸廣必先解散脅從而後可以擒渠魁脅從之民其初未嘗有從匪之心其後未嘗無自新之念皆可矜之屬也唐德宗時朱泚等自作不靖遠近騷然陸贄勸德宗宣布赦書宥其脅從百姓山東士卒感泣李抱眞見之以爲人情如此賊不足平也後賊果平皇上若宣布德音痛斥侵漁之吏深憐愚昧之民剴切曉諭使知聖主御宇之初正凡庶維新之日脅從者果能革面

洗心去逆效順卽飭地方官咨送原籍令其各歸故土各守本業
斯小民咸曉然於皇上德威交濟之妙用而無有梗化於其間
者漢光武建武十六年郡國羣盜並起發兵追討則解散去德屯
結後乃遣使者下郡國聽羣盜自相糾擿五人共斬一人者除其
罪凡牧令守長皆聽以檢討爲效但取獲賊之多少爲殿最惟蔽
匿者乃罪之於是更相追捕賊並解散郡國晏然此其明效大驗
載在史冊相應請旨飭下兩廣總督徐廣縉督飭該省文武官員
同心效力以獲匪多少爲賞罰庶幾匪徒卽可殲除上諭軍機
大臣等有人奏廣西匪徒滋擾情形一摺剿賊之法以保民固本
爲要必先撫恤流離解散脅從使賊勢日孤則渠魁易獲其平日
地方官因何肇釁必應確切查明懲辦庶羣情翕服志切同仇辦
理賊匪可期迅速戡事著徐廣縉按照摺內所指各條悉心體察

有無可採之處斟酌安辦又有人奏廣東盜風素熾近來尤甚圍城勒索設廠收稅賊目有陸和李和李法善黎東狗單眼德大鯉魚大頭羊等名號爲八千子弟與廣西賊匪勾通一氣皆由提鎮賣缺肥已參遊等扣餉虐兵府廳州縣縱盜殃民等語著徐廣緝迅速添派兵勇剋期剿捕並嚴飭所屬文武激發天良爲民除害務期迅速盡數擒拏不准一名漏網以儆兇玩而安良善並查明文武各官養癰貽患實據嚴行參辦毋稍徇庇各摺片均著鈔給閱看將此由四百里諭令知之○諭前據齊承彥奏請飭究洋盜巢穴當經降旨令陳慶偕於審辦東省見獲洋盜案內嚴究沿海窩頓地方茲據覆奏提訊盜犯等供稱浙江漁山東窩南磯北磯普陀山東頭山等處皆爲盜匪歷年窩頓之所漁山經官兵擣毀而東窩等處不免乘隙出沒該犯等籍隸閩浙以捕魚爲名潛匿

該處等語洋盜恃有島嶼窩藏肆出劫擄大爲商旅之害著劉韻珂徐繼畲吳文鎔照該撫咨開未獲各犯按名嚴拏並督飭水師弁兵於東窩南磯北磯普陀山東頭山各處嚴密按拏盜窩蹤迹立即掃蕩平毀其漁山一處擣毀以後是否有餘匪藏匿並著覈實查明務令一律肅清以清盜源而安行旅原片著鈔給閱看將此諭令知之○申定嚴禁冒籍跨考章程○壬寅諭軍機大臣等哈勒吉那奏卓扎巴地方產生章嘉呼圖克圖呼畢勒罕奏聞一摺章嘉呼圖克圖係勳舊有爲之呼圖克圖自涅槃以來已歷四載茲據哈勒吉那奏稱所生幼童噶勒臧楚克噶布據扎薩克喇嘛爵木磋稱此子似識章嘉呼圖克圖之物卽係呼圖克圖之呼畢勒罕等語朕聞知殊深欣慰惟此子甫經九月尙未能言從前乾隆年間若有呼圖克圖呼畢勒罕出世均將所生數子年歲花

名書寫籤支入於瓶內掣定著哈勒吉那轉諭吹布臧呼圖克圖
扎薩克喇嘛爵木磋等於該地方再爲訪察二三幼童及此子之
名一併具奏再降諭旨辦理○以宣宗成皇帝梓宮奉移山
陵再免經過地方明年額賦旗租並給平毀麥田籽種銀○癸卯
添造山東登州水師戰船礮位○甲辰諭軍機大臣等前因廣西
游匪滋事曾經降旨令徐廣縉前往會同鄭祖琛向榮督辦茲據
徐廣縉馳奏廣東見值匪徒滋事調度籌維均關緊要勢難親往
仍派文武員弁分帶兵勇前赴梧州會辦等語該督統轄兩省責
無旁貸惟東省見值多事自難兼顧西省係屬實在情形見在欽
差大臣林則徐甫經派往前任提督張必祿藩司勞崇光計亦未
抵粵西鄭祖琛向榮統兵督剿是其專責向榮接奉前旨想已兼
程帶兵星馳赴粵著卽與鄭祖琛督飭文武員弁激勵紳勇相機

進剿前派湖南兵二千名卽飛催該管將弁率領前往其貴州備調之兵二千名如見需用卽一面奏聞一面飛咨黔省調取總期迅速肅事毋畱餘孽以副朕望將此由四百里諭令知之○徐廣縉葉名琛奏廣東英德等縣游匪滋擾見在調集兵勇殲斃賊匪二百三十餘名內有頭目九名該匪等分股竄匿經候補知府史樸與署遊擊蘇崇額並參將齊誠阿等帶兵夾擊因佛岡鄉民導引不諳紀律一遇賊匪卽紛紛逃回以致衝散隊伍文武員弁同時被困旋復回營見在賊匪出沒數縣毗連界內臣等惟有嚴檄官軍視賊所向迅速殄除上諭徐廣縉等馳奏匪徒滋擾請將回營之文武員弁革職一摺匪徒圍困官兵殊堪髮指非大集兵勇四面兜剿不能迅就撲滅徐廣縉既未能分身前往廣西著卽專辦廣東軍務務須督飭提督祥麟臬司祁宿藻嚴飭文武員弁

相機設法分別堵剿所有水陸各隘口尤須加意嚴防勿令東西
兩省匪徒勾結蔓延並當斷其接濟解其脅從迅速進攻一鼓殲
除剋期蒞事其有奮勇出力及捐貲募勇者無論官員紳民准其
從優奏請獎勵如有畏葸退縮不用命者立即嚴行懲辦候補知
府史樸輕進失利著與巡檢顧侃千總蔣朝綱黃大奎把總黃舜
全外委姚連發王定祥黃雄泰記委任茂方均暫行革職仍責令
隨營效力署提標中軍參將齊誠額卸清遠營遊擊強其修是否
有意遷延著該督確查參辦前奏副將王浚受困不知下落亦著
查明具奏毋許稍有隱飾至所稱佛岡鄉民情願幫同擊賊用爲
前隊何以一遇賊匪紛紛逃回致令官兵受困是否不諳紀律抑
係勾通誑誘致墮術中鄉民導引勢所必需但須洞悉情形確有
把握方能得力著嚴諭帶兵各員臨事制宜不可稍存大意將此

由四百里諭令知之○乙巳 上詣正大光明殿 宣宗成皇帝

几筵前行祖祭禮○以恭懋 幕陵 隆恩殿 隆恩門 御書

扁額遣官詣 宣宗成皇帝几筵前告祭○諭內閣徐澤醇奏西

昌地震委員前往撫恤一摺並著帶銀兩接濟等語四川西昌縣

城內於八月初七日地震逾時衙署監獄倉庫倒塌軍民壓斃甚

多並有教授曾習傳教諭滕昇申均被壓傷殞命實堪憫惻著該

督迅委賢員前往詳加查勘妥爲撫恤毋使一夫失所需銀兩

著卽在於捐備經費項下動支以資接濟○丙午 宣宗成皇帝

梓宮發引 上奉 皇貴太妃恭送啟鑾朝夕詣蘆殿奠獻至庚

戌皆如之○諭內閣程喬采奏思茅邊外土匪疊被殲擒見將防

兵分別畱撤一摺雲南普洱府屬之思茅廳邊外車里土境游匪

滋擾疊經降旨令該督調集弁兵迅速殲除並飭務將戕官要犯

拏獲懲辦茲據該督秦稱疊次殲斃賊匪焚燒賊寨並生擒匪犯一百數十名其句結滋擾之刁準臣業已落江身死是此案匪徒見經疊加懲創自不值久勞兵力所有該省調集各鎮營兵練除酌畱各要隘防緝外餘著分起撤回歸伍見獲各犯分別審擬按律懲辦未獲餘匪仍著飭屬嚴拏毋任一名漏網其善後一切事宜著該督悉心妥議具奏○諭向榮奏迅赴調任酌帶官兵前往會剿一摺並另片奏請將已革守備周萬遠調赴粵西隨司剿捕等語前有旨令向榮馳赴粵西帶兵進剿茲據奏稱前經鄭祖琛奏調湖南精兵二千名已分派遴員管帶前往該提督前次派禦楚匪之鎮筸鎮標官兵四百名親帶常德官兵二百名著准其添派帶赴軍營會同剿辦周萬遠亦准調往隨營效力該提督務當督率官兵迅速掩捕立殲羣醜以靖巖疆○徐廣縉奏西省盜匪

東奔西竄廣東肇慶府屬處處犬牙相錯必須派撥弁兵防守要隘封川縣地方與梧州府相距僅五十餘里一水可通最爲扼要先經派委參將崔大同知州郭超凡會帶弁兵前往防堵又委副將齋清阿帶兵駐開建參將左忻帶兵駐廣定參將丁振剛帶兵赴梧州至剿捕英德佛岡等處盜匪除三江協南雄協各營早經調撥外嗣由提臣祥麟督帶提標兵丁一千名續又酌調督撫二標及廣協兵丁共八百名並調惠州永安營兵丁共五百名分起前往堵剿蓋盜匪本由西省裹脅而來誠恐捕拏嚴緊該匪等仍復潛行竄回與西匪合而爲一轉致愈難捕除必須於東西兩省相通要路豫爲派兵堵截方可相機圍捕是以徵調較多見在廣東英德佛岡等處疊經飛咨提臣並飭臬司會同迅速設法堵剿一俟續調之兵勇到齊撫臣葉名琛擬卽於九月上旬親往督辦

海疆省垣較之西省各縣尤爲緊要亦必須一人駐守控制方能

鎮靜

臣

更未便先期遠離總之

臣

統轄兩省責任綦重不得不權

其緩急通計熟籌以免顧此遺彼

上諭軍機大臣等粵東剿捕

事務海疆夷務均關緊要徐廣縉駐守省垣戶資控制葉名琛此

時計已親赴韶州督兵剿捕務須擇要防剿勿使兩省賊匪合而

爲一轉致愈難剪除一俟追剿得手即將見辦情形由驛馳奏粵

東見在夷情是否安靜並著隨時奏聞至粵西軍務該督亦須兼

籌熟計迅奏膚功以慰朕念將此由四百里諭令知之○命御前

大臣載垣端華僧格林沁恭理喪儀○庚戌上謁泰陵奉

東陵昌陵至昌陵隆恩殿恭奉冊寶加上尊諡曰

孝和恭慈康豫安成欽順應天熙聖睿皇后復詣慕陵隆

恩殿恭奉冊寶加上孝穆成皇后尊諡曰孝穆溫厚莊

肅端誠孚天裕聖成皇后

孝慎成皇后尊諡曰

孝慎敏肅哲

順和懿熙天詒聖成皇后

孝全成皇后尊諡曰

孝全慈敬寬

仁端慈符天篤聖成皇后○諭軍機大臣等徐廣縉奏接奉廷寄
籌辦廣西逆匪情形並遵查閱正風被參款蹟一摺另片奏添調
兵勇馳赴粵西等語又據葉名琛奏出省勦辦南韶游匪一摺粵
西逆匪肆擾既據該督等遵旨籌撥餉銀添調兵勇見經鄭祖琛
親駐平樂督辦且計向榮張必祿林則徐均可次第馳抵軍營會
商勦辦廣東英德等處游匪葉名琛見已馳往想亦能相機進剿
以期剋日殲除據稱兩省匪徒互相猜忌正可趁此解散脅從使
賊首孤立不至合而爲一句結滋蔓其毗連兩省之江西湖南貴
州各省該督等尤當隨時飛咨併力堵截所稱委員稟報昭平縣
屬有廣東英德賊匪竄入雖未盡確亦係意中之事總期粵匪不

至逃竄出境擾及鄰省不可稍存大意且恐匪徒假作嚮導誘我官兵前次諭旨已慮及此該督撫密飭文武各員隨地相機勿致墮賊術中方臻周密仍當飭屬勸諭紳民舉行團練必使志切同仇切不可視爲具文轉致有名無實將此由四百里諭令知之○革廣西提督閔正鳳職命來京聽候查辦○辛亥 宣宗成皇帝梓宮至 慕陵暫安 隆恩殿○諭內閣訥爾經額奏籌辦迎剝南糧情形一摺本年南糧重運因在途節節耽延見抵山東境內節候已晚自應籌辦截剝以免回空遲誤惟此次楊村剝船除已分遣迎剝外餘船一千五百隻已儘數解赴臨清若在連鎮安陵一帶截剝又須添雇民船難期應手著漕運總督山東巡撫仍照倉場侍郎原奏在於臨清截剝迅調東省小米軍船並官民剝船將江西後六幫湖南三幫糧米裝運抵通毋得互相推諉致誤回

空限期○諭陸建瀛奏覆南漕改折會議需時請仍照舊章辦理一摺又另片奏改折窒礙情形請免再議等語前因傳繩勛陳請蘇松太倉三屬改折漕糧給事中曹琳堅極言其難行經部議指出各情節諭令陸建瀛會同傳繩勛妥議茲據該督奏稱以辦漕見已屆期倉卒既虞貽誤復以折漕必致缺米更張更屬非宜在傳繩勛因收漕棘手欲爲變通自係爲裕國均戶起見而陸建瀛從本計深籌慮多窒礙亦係實在情形著如所請江蘇折漕仍照舊章辦理無庸會議仍飭嚴禁大戶小戶名目並不准幫丁於奏定幫費外稍有勒索總之南漕爲天庾正供果能變通盡利亦應隨時制宜該督撫惟當熟籌利弊國計民生期於兩有裨益方爲不負委任勉之○兩江總督陸建瀛奏疏防洋面劫案年餘未獲請將部司趙長庚革任得旨似趙長庚之庸懦無能者不一而足

況當廢弛已極爾地方大吏時時事事加意從嚴庶可挽回頽風
又奏沿海籌防先事豫備批實力實心妥爲辦理○以恭送 宣
宗成皇帝梓宮賞蒙古王貝勒台吉等及直隸辦差員弁加級沿
途兵丁一月錢糧並校尉夫役銀○壬子 上詣 慕陵 隆恩

殿 宣宗成皇帝梓宮前行饗奠禮回鑾○予總理承辦事務及

扈從守護之王大臣官員加級有差賞守護 慕陵拜唐阿兵丁

並隨往及看守各行宮弁兵半月錢糧○蘇敬衡以病免以查文

經爲福建按察使

由前任江南淮揚道遷

○乙卯 上奉 皇貴太妃還宮

○鄭祖琛奏廣西修仁荔浦賊匪經官兵轟擊殺斃多名而賀縣

地方游匪竄入昭平分爲兩股膽敢圍困官兵以致將士傷亡不

少其明江匪徒竄擾龍州該州同知王淑元不知下落其官親家

丁同時被戕千總家屬亦被擄去見飛飭官軍分路進剿力遏寇

氛 上諭軍機大臣等廣西修仁荔浦賊匪經官兵轟擊殺斃多名而賀縣地方游匪竄入昭平分爲兩股膽敢圍困官兵傷亡將士覽奏實深忿恨其明江匪徒復敢竄擾龍州戕害該廳官親家丁並擄去千總家屬同知王淑元不知下落尤堪髮指見已飛飭雲南督撫迅調官兵二千名馳往應援並諭知林則徐兼程赴粵督剿著鄭祖琛向榮張必祿會同妥籌督飭文武激勵兵勇迅速勦辦張必祿既未到營林則徐或亦尙需時日該撫等不可稍事遷延致存觀望之意其湖南貴州官兵迅卽飛催前來分路堵禦毋令該匪此擎彼竄並分咨鄰近各省不分畛域實力勦辦總須先分賊勢不得令其各股勾結其已就殲擒各匪地方又須安撫居民毋令失所致爲賊匪誑誘龍州同知王淑元並千總家屬如何下落甯明燧蘇兩川營及龍州倉庫監獄有無疏失一併查明

具奏將此由四百里諭令知之○諭鄭祖琛等奏修仁等處盜匪
屢次殲擒賀縣道石墟一股游匪被擊逃回又明江盜匪見在竄
至龍州滋擾派兵往捕各一摺粵西游匪殲獲殆盡昭平一股游
匪四出滋擾亟應厚集兵力大加懲創林則徐前已有旨授爲欽
差大臣頒給關防計已迅速馳往屢接粵西馳奏總以賊多兵少
股數不一鞭長莫及爲辭未見其因地相機扼要布置見在貴州
湖南雲南各省調兵赴粵已有六千餘名林則徐惟當通盤籌畫
酌量地勢遠近賊數多寡派文武各員分投進剿務將本夥渠魁
併力殲擒其脅從各匪設法解散總期迅速奏功毋致老帥糜餉
是爲至要將此由四百里諭令知之○徐廣縉葉名琛奏改安前
求採購臺灣雞籠山煤炭該督接據照會卽行斥駁該督在粵並
未續陳亦未聞在閩復申前說其欲換臺灣地方作爲港口見亦

並無動靜奏入諭令嚴飭文武加意防備持以鎮靜勿致別生枝節○調雲南兵二千名赴廣西剿賊○丙辰諭內閣慶祺朱崢奏節候已晚糧多限迫請豫籌備一摺據稱本年重運漕船北上節候已遲湖北三幫及江西前七幫見已起剝北上至江西後六幫及湖南三幫自安陵一帶剝運赴通道路遙遠恐有偷漏使水等弊且虞河冰凍結不能抵壩卽相機卸囤德州倉等語著漕運總督山東巡撫趕緊催趲總期以速補遲一律到壩儻因限期迫促隨後各幫不能全數抵壩應否卸囤德州倉以便回空南下該漕督等務當卽速籌商斟酌妥辦毋稍遲誤○戊午諭內閣漕糧爲天庾正供近來重運漕船不能如期抵壩以致回空歸次兌受新漕節節耽延上年空運軍船因運河淤墊阻滯直至春季始行催歸水次本年南漕減歇較多幫船起運爲數本少乃沿途並不實

力催趲節次脫空遲延江廣各幫或在臨清或在途次分別起卸
剝運見在節逾霜降水勢日消若不趕緊趲令歸次來年新漕受
兌必致貽誤關繫甚鉅著漕運總督嚴飭起卸空船卽刻連橋南
下銜尾趲行不准片刻停畱並著東河南河河督兩江湖廣山東
江蘇安徽江西湖北湖南各督撫分飭軍船經過地方派委委員
嚴切提催及早歸次毋任稍有遲滯並嚴飭約束經由各牘及起
堰澆塘役夫人等相度水勢分別蓄洩回空軍船一到立卽放行
不得稽畱阻擯再有玩延致干重咎來年新漕尤當趕緊辦理按
限兌開統限於四月初十日以前全數趲至清江剋期渡黃北上
毋得因本年回空較晚又復藉口耽延儻將節次所降諭旨視爲
具文仍致臨事周章有逾例限定將該漕督及有漕各省督撫嚴
行懲處決不寬貸懷之愼之將此通諭知之○是月緩江西湖南

各幫丁應交餘米

冬十月己未朔享太廟頒咸豐元年時憲書每歲皆如之○以山東歷城等屬本年麥收歉薄改徵粟米○庚申上奉皇貴太妃居壽康宮問安侍膳自是以爲常○諭軍機大臣等裕泰奏選派官兵揀員帶赴粵西一摺據稱粵西盜匪分股滋擾湖南永州寶慶等府屬多與毗連見有零匪竄入永明縣境搶擾等語匪徒擾及鄰境必應防其蔓延著裕泰駱秉章嚴飭地方員弁務於界連要隘處所併力截拏認真防堵切不可因偶有殲擒稍存大意是爲至要將此諭令知之○辛酉諭軍機大臣等有人奏江蘇盜風日熾始在鄉鎮搶掠鋪戶近則公然在城內行劫統計三月之中一里之內被劫者六起地方官置之不問等語若如所奏省城內盜賊公行劫案疊出該地方官弁所司何事乃竟未破一

案未獲一犯捕務廢弛已極著陸建瀛傳繩勛按照原奏各案嚴飭所屬認真緝拏務期匪盜悉獲按律懲辦以靖閭閻儻地方員弁始終玩忽不知振作卽著指名嚴參毋稍瞻徇原奏著鈔給閱看將此諭令知之○壬戌賜彭陽春等五十二人武進士及第出身有差○諭軍機大臣等廣西盜匪肆行前已授林則徐爲欽差大臣並續經降旨飭催迅速前進茲據徐廣縉馳奏盜匪又復闌入遷江縣城拒傷員弁旋即退竄等語數月之間連劫縣城被猖已極實堪髮指見已諭令徐廣縉鄭祖琛向榮等各督飭文武員弁確探賊蹤實力追剿並令程喬采喬用遷等各飭前調官兵星馳赴粵合力兜拏林則徐此時計已啟程在途接奉此旨著卽兼程馳抵該省乘此大兵雲集會同鄭祖琛向榮張必祿等激勵將士一鼓殲除以慰朕望毋稍遲誤原摺著鈔給閱看將此由四百

里諭令知之○諭徐廣縉馳奏盜匪闖入遷江縣城滋擾見飭嚴行追剿一摺廣西盜匪充斥數月以來據報竄入應州縣城拒傷官弁肆行劫掠迨經追捕又復飽颺雖據稱賊眾兵單亦何至官兵束手任聽搶劫各城如入無人之境耶此時向榮早已馳抵廣西見復降旨飭催林則徐兼程馳往督辦前調湖南弁兵業據裕泰奏稱調撥前進續調貴州雲南弁兵亦經嚴催迅速赴粵當可陸續到齊著鄭祖琛向榮張必祿會同悉心籌畫督飭文武員弁確探賊蹤實力追剿該撫身膺疆寄業因辦理遷延以致盜風日熾宜如何殫竭心力稍贖前愆該提督係朕特簡畀以重任張必祿亦久歷戎行尤當激勵將士一鼓殲除斷不准因林則徐暫時未到稍形委卸將此由四百里諭令知之○諭廣西逆匪連竄數城疊據徐廣縉鄭祖琛等馳奏情形已屢經降旨交該督撫等妥

籌迅勦矣茲復據奏盜匪擁入遷江縣城肆劫將該縣及委員等拒傷旋即退竄等語與鄭祖琛前奏略同該匪等肆行劫掠實堪髮指亟應厚集兵力以期剋日殲除見已降旨分別飭令鄭祖琛向榮督飭兵勇及時追勦林則徐兼程赴粵並令程裔采喬用選等選派將弁迅將前調雲貴官兵各二千名管帶馳往指日大兵雲集林則徐張必祿計將先後馳抵軍營惟兵貴神速見在賊勢披猖已極林則徐未到以前不可令在事文武稍存觀望徐廣縉務須通籌全局隨時知照鄭祖琛向榮督飭員弁防勦兼施既不可聽其分擾屬境尤不可任其竄入鄰封總期截擊兜捕俾免蔓延方爲萬全之計將此由四百里諭令知之○甲子諭軍機大臣等哈勒吉那奏琦善帶官兵將海蘭插帳雍沙番子殲斃淨盡奪獲牲畜擊打番帳一摺據稱該番等係奏明今歲應回玉樹原牧

見在海蘭地方住牧其平素有無爲匪未據營員稟報何以琦善帶兵輒將該番等殲斃淨盡該大臣據稟陳奏情節是否確實著哈勒吉那迅速查明並飭令該管之郡王等詳細確查據實具奏以憑覈辦將此諭令知之○諭朕聞琦善帶兵出巡將海蘭地方住牧番子殲斃淨盡並奪獲牛羊馬匹三千有餘擊打該番帳房一百餘頂該番等何時住牧海蘭地方共有若干戶何以未歸原牧該督因何將其殲斃淨盡著琦善據實迅速明白回奏毋許稍有隱飾倘混將此諭令知之○永定河隄合龍○乙丑 上詣壽安宮西所問 如皇貴太妃安自是以爲常○丙寅諭內閣戶部奏參漕運遲延一摺漕運抵通限期例有明文本屆遲延將及一月而在後江廣各幫尙無埽數抵通日期該漕督奏報摺內率以無閏之年與有閏之年牽混計算實與前奉 諭旨不符楊殿

邦著摘去頂帶仍星夜督催儘力趕趲不得以奏明截撥在前稍形疏懈總期多到一幫少截一船以節經費而免滋弊至本年漕糧爲數本少若地方河漕各督撫同心籌辦實力催趲何至渡江渡黃遲滯如此其各該省開兌遲誤及淮揚一帶運河淺阻與河水漲發灌放稽延之處著該管各督撫逐一查明據實嚴參具奏不得因去年辦理回空遲延又因該漕督見已降旨懲處遂爾各存成見自爲推卸地步轉瞬接辦新漕亟宜先期豫籌冬兌冬開按照定限設法趲辦各州縣衛所交兌新漕後立即催令開行總以渡江渡黃無誤期限經過運河無令淺阻爲要儻再藉口回空遲滯致明歲漕糧仍不能如期埽數抵壩實心任事之謂何各該督撫其能當此重咎耶懍之慎之○鄭祖琛向榮奏修仁荔浦大股賊匪竄擾武宣之三里墟副將李殿元帶兵進剿匪首陳亞潰

率黨渡河官兵分水陸兩路開礮轟擊斃賊多名落水死者無算
該匪奔潰潯州府知府顧元凱等率練勇追擊斃賊二三百名次
日官兵四面合攻斃匪四百餘名陳亞潰率黨翻山逃至灣龍崗
嶺一帶復經遊擊成保副將舒春已革知縣劉益謨薩畢圖各擊
斃數百名生擒一二百名陳亞潰及夥匪鄭廷威逃匿無蹤其太
平及右江河下另股盜匪我軍奮力進攻該匪退怯避兵而行官
軍分投梭剿斬獲甚多匪勢渙散惟該匪或仍由土田州河道上
駛乘隙糾合均在意計之中見飭在事各員弁一面嚴防郡城一
面速籌兜捕賀縣昭平兩股勢甚猖獗經縣丞白良棟巡檢胡城
宗帶兵往剿該逆抗拒拌死不退縱火燒山傷亡弁兵甚多白良
棟等均受重傷尙無下落其永安藤縣平南鬱林貴縣宜山各州
縣尙有匪徒四路竄擾河池州屬亦被蔓延前調湖南雲南貴州

各省官兵尙未到粵_臣等惟就見有兵力妥商剿辦 上諭鄭祖

琛此次剿賊尙屬認真所有奮勇出力之文武員弁著酌量保奏
候朕施恩毋許冒濫匪首陳亞潰見仍逃匿必當嚴密搜捕勿任
免脫其夥匪鄭廷威等並著趁勢追剿以絕根株毋稍疏懈○諭
軍機大臣等鄭祖琛等馳奏修仁荔浦大股盜匪剿除殆盡太平
及右江各股盜匪剿辦大獲勝仗各一摺賀縣昭平另股盜匪與
永安等州縣各匪分別剿捕情形各等語該撫於大兵未集之前
連獲勝仗生擒擊斃賊匪不下一二千名辦理尙屬認真惟修仁
荔浦賊匪雖經殲擒幾盡而首惡陳亞潰尙未弋獲見計向榮不
過甫經到粵林則徐張必祿到尤需時該撫等不可因獲有勝仗
稍存大意仍當嚴飭文武官員弁督率兵練於賊所往來處扼要
搜捕懸賞購緝務期必獲勿畱餘孽紳民有能縛獻賊首者朕必

立加重賞其太平及右江河下各股盜匪勢雖退怯難保該匪等不圖糾合或仍由土田州河道上駛以乘兵勇之隙亟應乘勢奮力相機截剿該處地隸極邊尤防竄逸句結著督飭在事各員弁一面守護郡城一面會剿兜捕以期迅就殲滅至賀縣昭平兩股匪徒先旣猖獗傷亡弁兵茲復抗拒燒山致帶兵奮勇之縣丞白良棟巡檢胡城宗等身受重傷見尙不知下落兵勇傷斃無數尤堪憤恨著該撫選調精兵督飭儘力攻剿嚴防分竄他處或逃回東省英德等處愈滋蔓延務須一鼓殲除仍遵前旨迅速咨行湖南雲南貴州將所調之兵催令管帶赴粵協力剿辦其永安藤縣平南鬱林貴縣宜山各州縣四竄盜匪股數不一並有竄至河池州屬滋擾情事亦當一併飭屬分投往剿不可顧此失彼致貽除惡未盡之患該撫身受重恩先旣未能弭患於未萌茲當各路文

武員弁勦辦得力之時卽著會同向榮督率兵勇一鼓擒渠以贖前愆而著後效不勝南望殷盼之至所有白良棟胡城宗等並龍州同知王淑元各下落仍著迅卽查明具奏護理新泰協副將謝陞恩據稱勇敢素著其接仗情形一併據實奏聞將此由五百里各諭令知之○丁卯准湖南幫船因風沈失米石分限買補○戊辰諭內閣傅繩勛奏縷陳漕務情形一摺前因陸建瀛奏南漕改折事多窒礙已諭令仍照舊章毋庸會議矣該撫所陳原爲甦民積困起見惟舊章驟難更變而銅弊必須力除該撫當嚴飭有漕各屬先去浮收並節漕費尤須將大戶小戶包戶等名目遵照道光二十六年欽奉諭旨概行禁絕如查有玩法不悛者分別參懲擊究毋稍瞻顧以肅漕政○諭吳文鎔奏海塘續坍口門業已堵合一摺浙江省本年秋閒因大雨奔注續經衝塌之雲騰二號

海塘缺口見已搶築堵合其前二次堵合之呂調字號土塘托壩亦屬穩固並無掣動仍著嚴飭工員隨時加鑲防護一面採購石料次第建復並將前奏險要處所柴埽等工趕緊興辦以資保衛吳文鎔前後督辦尙知奮勉所有前經革去頂帶之處著加恩賞還○先是給事中袁甲三奏遣犯脫逃流弊甚多請嚴定章程以期官民相儆下部議至是刑部申明舊例議覆得旨例有明文固無庸再議增添嗣後如奉特旨解審發遣人犯中途脫逃其簽差處分奏明請旨定奪毋得視爲具文○己巳朱履以病免以王懿德爲陝西布政使調福濟爲山東按察使以孫毓淮爲山西按察使由江西吉安府遷○辛未諭內閣慶祺朱嶠奏漕船後幫抵壩太遲險運不及請截卸天津北倉等語南漕後幫見已起剝北上仍著酌爾經額嚴飭飛速迎提儘力催趲務期進行到通趕緊驗卸並

速將天津北倉騰空豫備暫行截卸以便山東小米軍船及早南
下趕辦新糧如寶在轉運不及必須截卸北倉卽著慶祺一面奏
聞一面帶同坐糧廳一員迅往天津驗收一切准照舊章辦理總
須熟籌妥辦毋滋流弊○諭陸建瀛奏監務新章試行有效等語
淮南鹽務新章經陸建瀛督同聯英劉良駒等埽除積弊自開局
至今五月有餘已辦過上下兩半奏銷約十一月內外淮南全綱
可清合之淮北鹽課協餉計應共收銀五百餘萬兩辦理尙屬妥
善陸建瀛聯英劉良駒均著加恩交部議敘至楚西兩岸爲商販
行銷要地各該督撫務當飭屬一體督銷毋因新章初立稍存畛
域如果認真妥辦日有成效朕必加以鼓勵儻藉詞觀望致令滯
銷責有攸歸勿謂能逃朕鑒也○貸湖南各幫漕船撥價銀○壬
申申諭兩廣督撫勸諭兩省士民舉行團練○朝鮮國王李昇遣

使表賀登極進貢方物○癸酉貸山東汶衛兩河修堰銀○甲戌諭軍機大臣等林則徐奏遵旨啟行馳赴廣西一摺昨據鄭祖琛等奏報修仁荔浦兩處大獲勝仗賊匪殲擒殆盡而首惡陳亞漬兇尙稽誅所謂貴州湖南官兵各二千名計已先後到粵其雲南官兵二千名著該大臣卽速催調酌量分派堵剿所有軍需除本省籌款外其廣東湖南並戶部籌撥共四十萬兩該大臣仍當督飭嚴實支用毋許稍有冒濫設有緩急不敷著與該撫鄭祖琛並藩司勞崇光妥爲豫籌勿致臨時支絀該省賊匪滋擾將近一年近乃大肆披猖出入修仁荔浦遷江各城左右江各屬均被擾害疊據該督撫奏稱或係外來游匪或係土匪互相勾結是否各股絕不相謀抑有總頭目爲之號召何以四處搶掠同時並發究竟起於何時何地文武各官有無激變情事該大臣馳抵軍營逐一

查訪該撫鄭祖琛在粵有年何以無弭患未萌之策是否辦理延緩不能振作前任提督閔正鳳擁兵不出其營務廢弛已可概見業經降旨革職仍著查明平素是否別有劣蹟據實參奏貽誤地方各員查明一併嚴參其實在出力素嫻韜略或民情愛戴之員並紳士中有團練義勇互相保衛或捐貲出餉者均著該大臣查明據實保奏候朕破格施恩一切惟該大臣酌量情形辦理朕亦不爲遙制張必祿曾否到粵向榮係特調之員均必盡心協力總期勦撫兼施俾醜類速就殲除良民獲登衽席以慰朕望將此諭令知之○乙亥鄭祖琛奏修仁荔浦大夥首匪逃至賓州交界地方經遊擊成保督帶兵壯馳赴勦捕行抵黃練賊匪蟻擁前來該遊擊分投鈔勦轟斃賊匪數百名生擒數十名匪首陳亞潰乘閒逃竄副將李殿元同知吳德徵購緝偵捕見有賊竄至豬仔紫荊

山經文武員弁指揮兵勇斃賊多名潯州府知府顧元凱所調團
長李建勳首將陳亞潰擒獲委員兵練等並將該匪之弟陳火交
一併生擒其太平慶遠匪股復竄永康州劫獄放囚該署州妻女
同時被害另股賊匪竄擾河池該知州被其攔截守備吏目亦被
圍困見飭參將岳齡帶兵援應該參將所部雖屬無多已嚴飭穩
慎進取協同剿洗以期得力 上諭內閣此次連日攻剿疊獲勝
仗俾首匪不致免脫鄭祖琛剿辦頗能認真在事文武實力追剿
尙知愧奮所有前經革職畱任之潯州協副將李殿元署義甯協
副將舒春提標署遊擊宋煜署都司陶玉德署守備李進榮署象
州知州彭作檀均著加恩准其開復團長黎建勳奮勇爭先擒獲
首逆殊堪嘉尙著卽查明保奏候朕施恩其餘出力各員並紳勇
人等著確查據實保奏修仁荔浦首匪雖經拏獲太平慶遠等處

各股匪徒勢尙蔓延必有渠魁互相糾結務卽密訪嚴拏懸賞鼓勵紳民中有能縛獻著名逆首者朕必破格施恩見在林則徐計將到粵著與鄭祖琛向榮督率文武員弁激勵紳勇埽除餘孽以靖巖疆勉之望之○諭軍機大臣等據鄭祖琛片奏賊匪擁入永康河池兩州滋擾等語廣西逆匪連竄數城經該撫督飭員弁分投剿捕疊獲勝仗殲擒一千餘名並生擒首逆陳亞潰等是修仁荔浦一股賊匪剿辦尙能得手惟太平慶遠各屬賊匪股數眾多見復竄入永康州劫獄放走人犯並將該署州妻女殺斃又有賊匪竄入河池州滋擾守備吏目均被圍困該州亦被攔截雖有參將岳齡帶兵接應而眾寡不敵攻擊難期制勝向榮見已抵粵林則徐計亦將次趕到著與鄭祖琛悉心會商通盤籌畫所有已經檄調尙未到營之兵著卽飛咨提催如兵力仍屬不敷卽一面奏

聞一面咨調想林則徐必能酌量情形不至輕於徵調也其右江鎮總兵惠慶前據奏稱調派兵弁迎擊追剿尙知機宜並著飭令因地相機盡力勦捕林則徐鄭祖琛向榮三人駐紮處所無論分合總以扼要制勝追捕截拏俾賊匪不能互相糾結分竄滋擾庶可殲除羣醜迅速蕲功朕有厚望將此由五百里諭令知之○以有人奏閩省洋人霸占省城內外各寺強買民房起造樓屋並釘塞礮眼騎馬四處踏勘各鄉民驅斥地方官反出示禁阻又用鳥槍打傷幼孩委員查驗含胡稟覆賄和了事等情命劉韻珂等據實覆奏○丙子前任刑部尙書李振祐卒予祭葬諡莊肅○添備直隸永定河工稽料二百四十萬束並酌增運腳銀○戊寅諭軍機大臣等惟勤奏遵查朝陽縣七道嶺見無窩盜處所並擬定緝捕章程一摺朝陽縣七道嶺地方既係著名窩盜之區所稱委員

挨戶編查並無窩畱盜賊之家等語難保非聞拏逃匿掩飾一時
仍著該都統選派員弁不時輪往巡查務期探悉匪蹤拏獲究辦
斷不可恃有按月詳報章程僅以一奏塞責日久致成具文轉多
廢弛至該處與奉天省接壤此拏彼竄自所難免並著隨時知照
盛京將軍奉天府尹督飭文武各於交界處所無分畛域實力
堵緝庶兇徒不至漏網另摺覆奏太平社有益緝捕著卽按照舊
章認真辦理所有該處著名各匪見在有無弋獲未據詳細奏明
著仍遵前旨一併飭屬密訪嚴拏不可任令遠颺是爲至要將此
諭令知之○己卯諭內閣戶部議覆朱崑奏南糧到遲豫籌暫囤
一招漕糧儲積理宜慎重若分段蘆囤易滋流弊較之在船守凍
尤難防範見在河凍未至堅結仍著該侍郎相機督催儘力趕趲
運進京倉總期多進一石多得一石之益此後酌量情形如實在

轉運不及止可將餘贍米石暫卸通倉寄囤一俟冰融再行安速運京以便幫丁卸米趕卽南旋受兌無誤新漕其運赴通倉腳費准其覈計應用銀數咨部給款墊發由漕督河督查取辦運遲滯各員分成賠補解部歸款至驗收漕糧係倉場侍郎專責如見在剝運有潮溼不堪存收之米應飭認真查驗設法妥辦儘進倉以後徵變虧損責令該侍郎等照例分成賠補以重倉儲而杜諉卸○諭軍機大臣等據琦善奏接捕柯柯烏蘇羣賊並勦滅雍沙番賊一摺另片奏各犯解省並斥革格窩嚴查漢奸各等語據稱該番役連年夥搶爲西甯甘州涼州肅州之巨害該督派兵勦捕而柯柯烏蘇地方羣賊先已竄去因將雍沙番賊勦除並訊據生擒各犯供認搶劫多案且百戶尕嚕噶百總凍都嚕父子糾搶戕害大員自應嚴切訊究毋任狡展所有與賊通信令其逃避之察罕

喇嘛旗下蒙古章京格窩著卽革去翎頂一併嚴訊青海大臣衙門蒙古通事何以有三十餘名之多據稱有偷漏消息等情亦應確查覈辦惟前據哈勒吉那奏稱該督將海蘭地方插帳雍沙番子殲斃淨盡該番等平素有無爲匪未據營員具報該管蒙古郡王等亦稱該番素無冒番行搶情事甚至痛哭流涕懇請辦理並稱恐附住之阿里克族番與察漢那們罕旗蒙番人戶心懷疑懼等語當經降旨令該督明白回奏著琦善遵照前旨一併查明據實具奏毋稍含混將此諭令知之○庚辰諭內閣明年正月十四日 皇考宣宗成皇帝初週年忌辰是日恭值 祈穀大祀祇承之義統於一尊自應虔詣 南郊行禮惟霜露之感歲序倏周瞻望 几筵未克躬親奠獻卽屆期恭遣代祭朕心追慕實有難安謹於十四日 祈穀禮成後次日啟行十八日駐梁格莊十九日

祇謁 西陵禮成後恭詣 皇考慕陵饗殿几筵前補行初週年祭禮稍申哀戀之忱是日仍駐梁格莊二十三日還宮所有先期遣派恭代及補行初週年祭典禮著恭理喪儀王大臣會同禮部敬謹詳議以聞並著各該衙門直隸總督一體敬謹豫備○諭徐廣縉葉名琛馳奏廉州擒獲匪黨並英德一帶剿辦情形一摺據稱賊匪方晚一股竄匿合浦縣之常樂墟經護理海口營參將黃開廣施放連環大礮轟斃賊匪二十餘名殺斃四十餘名生擒三名受傷後死者一百餘名等語此股賊匪最爲強悍且與粵西處處毗連該鎮道等剿辦尙屬得手該督等趁此機勢仍宜諄飭文武併力圍拏毋稍疏懈其英德一帶賊匪經南韶連鎮總兵崑壽偵探賊匪由山徑闖出意欲越河搶渡親督兵勇極力抵禦斃賊多名剿辦頗能認真署南雄協副將王浚旣已失利於前又復偷

生於後庸懦無能著卽革職枷號兩箇月在軍營示眾該督撫等
仍當悉心籌畫將廉州英德兩處匪徒盡力按剿不可因偶有殲
獲稍涉大意文武各員及紳勇中有能殺賊立功者據實保奏候
朕施恩儻有臨陣退縮貽誤事機者立卽嚴參懲辦至廣西橫州
博白兩處團練章程前已有旨令徐廣縉分飭兩省仿照妥辦茲
據奏稱業經通飭各州縣因地制宜並刊刻學政許乃釗所輯鄉
守團練之法通行辦理著卽飭令各屬實力奉行毋致有名無實
將此由四百諭令知之○諭徐廣縉奏廣西賊匪竄擾龍州情形
並參奏潯州文武防堵不嚴及覆陳籌餉添兵等情各一摺前因
廣西各屬賊匪滋事廣東廉州韶州各屬亦正在勦匪之時恐徐
廣縉未能兼顧特命林則徐爲欽差大臣馳往督辦業據該大臣
馳報於十月初二日由福建汀漳廣東肇慶一帶馳赴粵西計在

途已與徐廣縉籌商一切矣鄭祖琛先後奏報將竄擾修仁荔浦賊匪殲除甚多並獲逆首陳亞潰與其弟陳火交業經明降諭旨仍飭將太平慶遠各匪扼要分剿茲據該督具奏各情所有龍州同知王淑元與千總家屬如何下落該廳倉庫監獄有無疏失卽著該大臣等查明具奏其潯州府知府顧元凱據鄭祖琛奏稱飭調團長黎建勳堵截按捕該逆首實由黎建勳首先擒獲署武宣縣劉作肅與副將李殿元等均在武宣桂平交界各山邨接捕出力該督參奏顧元凱劉作肅革職畱任自係在首逆未獲之先是否該員等始終堵禦不嚴抑此次拏獲首逆尙有微勞之處著林則徐徐廣縉復行確查據實奏聞再降諭旨見在向榮已抵粵西所調湖南貴州各官兵計將陸續到齊滇省官兵徵調較遲如有未到各兵迅卽嚴催俟到後分路扼要堵截徐廣縉專辦東省賊

匪仍遵前旨毋庸前赴梧州惟兩省皆係統轄勦賊事宜著隨時與林則徐咨商辦理聲息相通不致隔閡杜絕匪徒互竄蹤跡庶兩省勦辦更可得力至廣西舉人李宜用等呈控各案單開姓名並著督飭文武指名嚴拏究辦毋任漏網將此由四百里各諭令知之○辛巳諭內閣御史汪元方奏浙江水災多由棚民開山水道淤阻所致請飭查禁等語浙江杭州湖州等府屬近山各縣多有外來游民搭棚羣聚山中開種苞穀翻掘山土以致每遇大雨沙礫盡隨流下良田化爲礮瘠下游溪河受淤水無去路近年雨水稍多漫溢成災實爲地方之害該御史所稱棚民於買山時不肯稅契過戶巧立名目謂之召租鄉民貪受小利日後賠納錢糧而該棚民等去畱無定往往潛行竊盜盜案之多亦由於此著該撫吳文鎔飭屬嚴查未開各山永不准容畱棚民私買私開其見

有棚民墾山各處亦宜察看情形設法清理事關民田水利務須認真查辦始終無懈不得視爲具文朕思窮民謀食原所不禁惟以開山窒礙水道且恐日久藏奸轉難稽察浙省如此其江蘇安徽江西湖廣等省傍山沿江各州縣難保無私墾山田使下游填注淤塞民田受害之處著各該督撫通飭所屬一體實力稽查各就本地情形設法妥辦不得謂積重難返將就目前致釀後患另片奏本年取造棚民戶冊如餘杭一縣府房需索規費爲數甚多並用空白印冊捏填姓名戶口似此虛應故事且任聽蠹胥婪索成何事體著吳文鎔嚴確訪查提究懲辦以後務令該地方官親自履勘造冊詳報不准假手書吏以昭覈實而杜流弊○諭戶部奏吉林所轄伯都訥等處官荒地畝申禁私墾等語雙城堡珠爾山涼水泉夾信溝四處閒荒地畝前於道光二十七年該部奏請

封禁奉 旨責成該將軍副都統及各協領等認真查禁並於年終查明有無私墾奏報一次乃自奏定章程以後惟二十八年曾經奏報二十九年並未具奏足見奉行不力視爲具文著吉林將軍固慶等欽遵前奉 諭旨實力查察按年具奏毋稍懈玩至珠爾山荒地一萬九千七百九十二晌見准撥給官兵承種以資津貼其餘存贖閒荒地畝仍著該將軍等按照戶部所奏明定畝數隨時確查毋令流民闖入私行開墾再滋流弊○壬午徐廣縉奏臣奉諭旨飭查廣西巡撫鄭祖琛被參各節查廣西盜賊充斥原非一年始而勤加捕除尙不至十分猖獗自鄭祖琛抵任後專事慈柔工於粉飾州縣亦相率彌縫遂致釀成巨患卽如本年七月酌委道府分路查辦一摺臚列歷次擒獲賊匪名數謂外盜均已分竄土匪亦漸能解散曾不踰月而修仁荔浦遷江之失事踵起

賀縣知縣鶴年實係畏難自盡並非被戕至於陣亡營弁張文華等十一員則係爲賊分路鈔襲以致敗北實非爲山水漲發漂沒此共聞共見之事何敢稍爲掩飾若招撫張亞詳一起則由於前左江鎮總兵盛筠苟且貽誤卽護送船隻亦由河路梗塞行旅皆有戒心託其保護初非官爲號令而官亦竟有時賴以伴送者總之鄭祖琛世故太深周旋過甚祇存市恩之心全無急公之義且年老多病文武皆不知畏服廣西官紳卽有謂其賞罰不明人心渙散之語若謂釀患由於該撫不令其置身事外非僅呼應不靈轉致羣相掣肘實屬有損無益合無仰懇天恩迅簡實心任事之大員專駐督辦俾資補救 上諭內閣廣西自上年以來盜匪充斥搶掠城邑分股肆行朕早聞鄭祖琛閔正鳳廢弛貽誤疊經嚴諭勦辦並將閔正鳳先行革職旋據給事中袁甲三奏鄭祖琛欺

飾彌縫各情並都察院奏該省各屬紳民赴京控告當降旨交徐廣縉稟公查覈據實參奏茲據覆奏鄭祖琛抵任以後專事慈柔工於粉飾州縣亦相率彌縫遂致釀成巨患等語該撫平日如果振刷精神講求緝捕何至粵西一省羣盜如毛數郡民生受其蹂躪見在賊首陳亞潰雖已擒獲正法修仁荔浦大股賊匪殲滅將盡而左右江各屬賊勢尙復蔓延且據徐廣縉奏稱該撫年老多病文武皆不知畏服若仍令戴罪自效亦難望其振作鄭祖琛著卽革職林則徐以欽差大臣暫署廣西巡撫督同向榮等盡力勦捕仍將徐廣縉所奏鄭祖琛欺飾各情及閔正鳳畏葸無能前任左江鎮總兵盛筠苟且貽誤並地方失事文武各員諱飾縱弛之處一併逐細查明分別據實具奏毋得稍有不實不盡○諭軍機大臣等據徐廣縉奏查覆廣西賊匪情形並遵旨參奏巡撫鄭祖

琛各一摺本日已明降諭旨將鄭祖琛革職令林則徐以欽差大臣暫署廣西巡撫事務矣該大臣見計可以馳抵粵西所有竄擾修仁等處盜首陳亞漬業經擒獲正法其同夥之鄭廷威一犯尚在稽誅難保不糾合餘黨復圖分竄況該省各郡賊匪尙多著名頭目亦必不少亟宜迅速剿捕著林則徐專辦廣西剿匪事務督飭在事文武務將鄭廷威並各股首匪設法購緝擒獲庶夥匪易於解散地方迅就蕩平據徐廣縉奏廣西捕賊團練之力居多鄭祖琛前奏陳亞漬卽係團長黎建勳擒獲該省紳民急公奮勇實屬可嘉若各屬皆能協力同心何患賊難殄滅紳民自衛尙且助兵殺賊豈各營兵弁不能出力衛民該大臣惟當整飭紀律激勵兵民乘此聲威剋期蒞事前經招降賊首陳亞祥聞投首後仍與賊暗通消息深恐勾結各股或引誘兵勇失路遇伏尤應密訪嚴

防切勿墮其術中致滋後患賀縣知縣鶴年究係如何身死之處著該大臣抵粵後就近覆查具奏徐廣縉摺鈔給該大臣閱看至廣東韶連各屬游匪滋擾亟須大加懲創葉名琛出省督剿該督徐廣縉駐省調度一切正可專心籌畫迅期肅清兩省剿捕事機總宜互相知照勿令賊勢勾結是爲至要將此由四百里各諭令知之○甲申諭內閣杜受田奏接據前任漕運總督周天爵來信內稱九月閒經過河隄詢知本年黃河入海之處坍塌數百丈是以盛漲旋落乘此冬令水小按其坍塌之所多築草壩偏流攻刷可期事半功倍等語近年黃河形勢日淤日高每歲增培隄工河身受病滋深若如周天爵所稱見在河口坍塌甚寬乘機築壩藉以偏溜攻刷亦係因勢利導之法惟河流入海之處因何忽有坍塌必應如何籌辦方期流導深通永除河患著陸建瀛楊以增親

往察勘情形悉心籌議迅速具奏毋致坐失機會○乙酉命莊親王奕仁成郡王載銳恭齋冊寶詣 孝德皇后殯宮行冊諡禮○諭內閣廣西各屬近來被賊蹂躪吾民顛沛流離致多失業覓在徵調頻仍兵差絡繹各處紳民猶能舉行團練殺賊立功朕每覽該省奏報嘉尚之餘益深憫惻因念窮黎蕩析杆柚幾空若仍令其輸納正供不惟民力拮据朕心實有不忍所有廣西本年應徵錢糧著林則徐迅委賢員查明被賊滋擾及官兵經過地方分別蠲免緩徵其已經徵收之區尤應確查覈實辦理毋令官吏蒙混滋弊林則徐務當悉心體察軫恤民艱迅速詳查具奏以慰朕懷○丙戌以冊諡 孝德皇后禮成頒詔天下○頒 硃筆罪穆彰阿耆英諭曰任賢去邪誠人君之首務也去邪不斷則任賢不專方今天下因循廢墜可謂極矣吏治日壞人心日澆是朕之過然

獻替可否匡朕不逮則二三大臣之職也穆彰阿身任大學士受累朝知遇之恩不思其難其慎同德同心乃保位貪榮妨賢病國小忠小信陰柔以售其奸僞學僞才揣摩以逢主意從前夷務之興穆彰阿傾排異己深堪痛恨如達洪阿姚瑩之盡忠宣力有礙於己必欲陷之耆英之無恥喪良同惡相濟盡力全之似此之固寵竊權者不可枚舉我皇考大公至正惟知以誠心待人穆彰阿得以肆行無忌若使聖明早燭其奸則必立寘重典斷不姑容穆彰阿恃恩益縱始終不悛自本年正月朕親政之初遇事摸稜緘口不言迨數月後則漸施其伎倆如英夷船至天津伊猶欲引耆英爲腹心以遂其謀欲使天下羣黎復遭塗炭其心陰險實不可問潘世恩等保林則徐伊屢言林則徐柔弱病軀不堪錄用及朕派林則徐馳往粵西剿辦土匪穆彰阿又屢言林則徐未

知能去否僞言熒惑使朕不知外事其罪實在於此至若耆英之
自外生成畏憚無能殊堪詫異伊前在廣東時惟抑民以奉夷罔
顧國家如進城之說非明驗乎上乖天道下逆人情幾至變生不
測賴我皇考炯悉其僞述令來京然不卽予罷斥亦必有待也
今年耆英於召對時數言及如何可嬰如何必應事周旋欺朕不
知其奸欲常保祿位是其喪盡天良愈辯愈彰直同狂吠尤不足
惜穆彰阿暗而難知耆英顯而易著然貽害國家厥罪惟均若不
立申國法何以肅綱紀而正人心又何以使朕不負皇考付託
之重歟第念穆彰阿係三朝舊臣若一旦寘之重法朕心實有不
忍著從寬革職永不敘用耆英雖無能已極然究屬迫於時勢亦
著從寬降爲五品頂帶以六部員外郎候補至伊二人行私罔上
乃天下所共見者朕不爲已甚姑不深問辦理此事朕熟思審度

計之久矣實不得已之苦衷爾諸臣其共諒之嗣後京外大小文武各官務當激發天良公忠體國俾平素因循取巧之積習一旦悚然改悔毋畏難毋苟安凡有益於國計民生諸大端者直陳勿隱毋得仍顧師生之誼援引之恩守正不阿靖共爾位朕實有厚望焉布告中外咸使知朕意○命戶部尙書賽尙阿協辦大學士○展八旗兵丁應扣借支庫銀期限○丁亥諭軍機大臣等寄諭欽差大臣林則徐等據徐廣縉奏報廣西拏獲兩次攻城戕官首匪一摺前據鄭祖琛奏獲首匪陳亞潰並其弟陳火交當經明降諭旨飭將奮勇爭先之團長黎建勳並出力各員及紳勇人等查明保奏茲據該督奏稱該匪等經署桂平縣知縣李孟羣署武宣縣知縣劉作肅並府經歷楊潤等帶同黎建勳等擒獲首匪其該犯之弟陳二是否卽陳火交此外有無著名逆匪在內其分夥之

鄭廷威一犯尙在稽誅著該大臣遵照歷次諭旨查明並嚴飭文武員弁迅卽設法將鄭廷威擒獲懲治其餘各屬盜匪亦著迅速剿辦毋令兩省勾結蔓延至此次出力各員並團壯紳士等與鄭祖琛原奏是否相符著該大臣會同該督確切查明奏請恩施毋許冒濫將此各諭令知之○諭徐廣縉葉名琛奏剿辦匪徒及澳夷情形一摺廣東各路追剿漸次得手其餘游匪較多急宜乘勢追捕一鼓殲除著徐廣縉葉名琛督飭在事文武分路進剿務將首要各犯迅獲脅從解散兩省交界處所尤應嚴防勿任勾結至所稱澳夷兵頭潛至香港向咬咬播一節仍著徐廣縉加意防範隨時偵探據實密奏不得以見在無事稍涉大意將此諭令知之○戊子諭內閣扎拉芬泰等奏添造礮位一摺塔爾巴哈台所存礮位僅有劈山子母等礮著照所議准其捐造擡礮一百尊並

著於滿洲營換防兵丁內挑選精壯合陣操演所需鉛丸火藥准其照數在烏魯木齊一帶按年派員採辦應給價值卽在本處充公項下動用仍於年終造冊報銷○諭徐澤醇奏查辦地震被災情形一摺四川西昌縣城鄉一帶於八月初七日地震城垣衙署倉庫監獄概行倒塌壓斃男婦二萬六百餘名口覽此情形深堪憫惻朕爲天下主一夫失所皆朕之過也著該督迅委賢員確切查勘按戶給予賑卹其被災處所應行蠲免錢糧之處迅速查明具奏甯遠府教授曾習傳西昌縣教諭滕曷甲把總吳應賁蔡福雲騎尉賈志先胡祥外委馬坤戴文熙同時被壓身死著照例賜卹其會理州屬亦同日地震並著該督迅卽委員查勘撫恤據實具奏○山東巡撫陳慶偕奏報校閱省標營伍情形得旨汝自到任以來事事整頓深可嘉尙靡不有初鮮克有終不可不引爲龜

鑑也又奏登州鎮水師總兵員缺需人請旨簡放批水師總兵實屬乏員汝姑待之又批周天爵之子周光碧朕聞其於水師甚屬去得汝可令伊在洋面學習隨時察看能否再行具奏見既經汝委署都司如無人接署亦可暫緩○是月緩徵安徽無爲等五十州縣衛湖北沔陽三十九州縣衛山東濟甯等五十二州縣衛水災旱災吉林三姓地方被水旗民新舊額賦